


5237.8/7922(7)  
C12

近代詩鈔

七







近代詩鈔

江湜

湜字弢叔江蘇長洲人附生官浙江候補縣丞有伏敵堂詩錄

石遺室詩話弢叔詩力深透彭詠莪相國序以爲古體皆法昌黎近體皆法山谷無一切諧俗語錯雜其閒憂憂乎超出流俗固矣然弢叔近體出入少陵古體出入宛陵而身世坎壈所寫窮苦情況多東野后山所未言近人則鄭子尹金亞匏未能或之先尋常命筆每首必有一二語可味者咸同閒一詩雄也

得月生先生書因寄五十韻代柬

屋角秋聲乾隣牆頰棗頰庭隅菊有芳意冷不延蜨感秋復羈



旅滯慮日慄慄凌晨乾鵲鳴下牀履初跼客或故鄉來抽關樂  
延接因得先生書喜若吏承牒伏讀見情親藏弄入巾篋惟思  
裁報難不盡語喋喋京城門九軌鞍馬日蹀躞宦客影華纓豪  
兒穿袴褶曉鼓一發時緇塵罨樓堞攀龍亦何才呼鷹詎爲俠  
此邦遊士風有荆高蓋聶今異古所云徒誇名利捷僕自吳會  
來屑屑欲何獵長安不易居幾草乞米帖惟餘文字雄不受聲  
利壓高歌動鬼神俗物生謗譁此事知者難或譽不我愜美人  
背後看僅許見腰褊愛龍駭其真不少楚尹葉每懷先生賢夢  
劃渡江楫憶初宅甫里學問乍關涉雖操文字觚未離童子鞅  
先生首相援文壇要偕躡導之徑不歧譽而衆乃帖如矇叟得  
相索塗轉穩貼又如蹙浮圖起廢有人挾逮今十寒暑髭生不  
勝鐻聯襪一朝分舟車我疲茶流光去不返猶汗之既浹嗟跼

平昔心侘傺夢成魘奈何一知己履跡不相躡自別伍胥門八  
回落莫葉豈無惓惓懷水重山百疊念欲仍束裝南游買行艤  
歸占吳淞田弟妹行晨饁雞彘有闌柵裋褕容緜縵與先生過  
從促坐聯袂言丁俠反揚子方話雨剪畦蔬葵莧佐七椀鋤犁  
釋手時筆管亦間捻著書仿何人汜勝賈思勰豈知天所械一  
窮爲接摺牽挈塵壤間欲歸不能輒商飈已淒緊庭柯欵菘攏  
候陽就前榮寒座待氎氎誰堪迫凋年復彈馮驩缺春當走海  
岱試往豁旅曉飄轉如浮萍詩讖固已協矢詞寄先生聊奉開  
笑靨

寓齋雜題

日歸日歸胡不歸穀鯨車前木葉飛孟生苦欲到京國豈謂鬢  
絲能織衣



方疏明幌障寒風將見圍鑪炭擊紅吾家餽爨薪應少無小雞  
山地一弓

歸里數月復作閩遊胸中雜感及卽事紀行不能無作拈

楊誠齋詩天寒短景仍爲客日暮長亭未是家爲韻到

閩時適成十四首錄藁甄去其三 錄二

美人弄姿首窺鏡始自矜青山照江水亦覺美不勝昨次富陽  
郭山暮煙光凝今晨泛桐廬仰面看峻嶒遠人欲無目伐薪最  
高層石壁驚倒垂下有寒流承挽夫走其上短絳琴弦絙尤愛  
船上水平若斗熨繪水行有此適何厭來頻仍前去七里瀧高  
捐嚴子陵惜哉山水佳垂釣吾未能

山上萬鬣松綠映一溪水溪橋晚渡人山峽集村市市盡虛無  
煙累塊辨山趾寒篠高下生樵者爭投止一翁倚擔眠山鳥呼

不起一童枕其股折腳結樓履上有榕樹林拏根如曲几一翁  
坐且凭昂首忽延企遠見兩童歸擔影夕陽裏何來箬篷船向  
晚泊於是若畫野趣圖船頭着江子

由江山至浦城雪後度越諸嶺輿中得絕句九首 錄三

連霄雨霰苦紛紛今上籃輿盼夕曛萬竹無聲方受雪亂山如  
夢不離雲

一隊行人裁下嶺有翁迎門賣麥餅此翁作計倘如吾早去踏  
山看雪景

嶺外行雲如走馬晴色下曬山家瓦殘雪忽墮適打頭我自看  
雲立松下

福州冬候不寒因卸敝裘有作

我生軀幹頗嫌短僅可周尺七尺強深衣長不滿六尺向來手



製勞阿孃因遊京師度寒歲寄衣不到風其涼從人小市買衣  
去估衣之京中地名也賤值姑取花羔羊遂客齊魯歷海疆此裘遠  
道勞攜將不願人之貂鼠貴冬日在體夏在箱歸家有弟如兄  
長既非童子宜裘裳解裘衣弟今幾歲敝又改紉重裁量由來  
羊寒非盛服被我寒士聊增光更將餘暖逮我弟一物既久情  
難忘今冬我復入閩粵有衣典盡愁雪霜弟持此裘重衣我謂  
將涉遠凌寒岡豈知入閩恆燠若卸裘不用維炎方吾吳正在  
大寒節卻憶吾弟寒難當安能寄裘仍衣弟毋使奇暖空堆牀  
嗟乎千里異寒燠一家骨肉徒相望

春朝試筆

廟堂何策靖風塵悵望江南有旅人欲向故鄉梅柳說賊邊且  
歇一年春

旅情二首

家書久不至孤館心徘徊今晨寄書去便將回書催回書待去  
書到否先難猜即使去書到到日回書回往返涉三月客念灰  
復灰恨身非黃鵠不得遂飛歸歸亦奚不可但非來時懷來時  
不計遠悔遠今莫追且恐悔而歸歸後重思來思來又成悔不  
若無歸爲嗟嗟遠遊子有恨常難裁

歸心不能釋歸計終難圖譬如生於閩閩實我故都一心作此  
想豈復思歸乎然吾有親在不歸親舍孤即使爲閩人而有親  
在吳亦當去尋親使親老得扶以此仍思歸自覺心難誣浩浩  
大地春忽忽春日徂願辭負米役去作耕田夫田夫耕得米不  
假行長塗

福寧寓齋感興



屋頭山色青更濃啼晴山鳥來城中門外日日吹春風隔牆飛  
入桃花紅桃花開時我不出鎖院晝閉門重重坐知春去不可  
挽落英滿地長條空客中逢春已可感而况不與春相逢今春  
已去足惆悵更恐來日仍怱怱我遊到處留羈蹤身如野鳥投  
樊籠年光消盡鄙事裏中抱微尚誰爲同有酒莫入羈人胸一  
酌卹敵千憂攻要當斷臂發悲願洗滌萬事參禪宗年將四十  
不適志一生長恨知何窮

雨餘

好遊心自喜山程復此前山放午晴谿水綠時真是酒野花香  
得不知名雨餘一笠行還佩風處單衫着更輕便算爲僧行脚  
去何須歸籍就諸生

道中憶舊僕沈用作四詩以酬昔勞

錄二

七閩非通塗遊子勞可憐有山更無地谿谷相鉤綿昔我將過  
溪沈用在我前喚船早相待從岸攀船舷意思爭渡時船兀我  
或顛及我將上嶺沈用來輿邊以手扶輿行欲代輿夫肩意思  
輿或傾墜我千丈淵我時在道路自管食與眠餘事悉付渠閒  
裁詩百篇沈用今不來難復如當年

沈用值館齋亦自肯勤力晨起不裹頭洗硯急磨墨使我作字  
多筆勢進一格最喜拭几案時能整書冊我慵彼習勞資用獨  
有益他僕無事時惟有飲酒癖或晝臥如尸一懶不供職或日  
召徒黨攤錢開博席沈用處衆中長醒而獨默侍我夜讀書雖  
倦無怨色呼之仍響應常若在我側所以終三年未嘗見訶責

塗中書意

客身渺與世無關盍且歸家日養閒自信十分不解事尙貪一



路好看山心期當代知交外人老編年詩集間差喜北來鄉國  
近浪遊興盡便于還

連夜月下作

月光如練階前鋪寫出庭樹枝扶疏有如一幅雙松圖忽然變  
滅瞥眼無月輪正掩雲模糊久之雲散月復出樹影移到牆東  
隅循牆而行若可娛一樹一月及一吾此身昔由造物賦本非  
有二今非孤胡爲對景坐歎息羣棲羨彼枝頭鳥

上杭道中投驛舍避雨

山雨橫驅風入松疾行偏與雨先逢天流雲氣吞孤日谷應雷  
聲撼別峰投避客輿人蠢蠢駭崩驛屋勢洶洶先生狂欲索高  
屐走向靈湫看鬪龍

有感

秦淮水次秣陵前歷歷秋遊記昔年懷古詩情驢背上隔江山  
色雁行邊南朝寺引文人屐北曲歌傳酒客筵此日西風莽回  
首一城白骨澹寒煙

重遊龍巖洞次舊韻

倚巖迴望一州開手拂前題落舊苔山水待詩詩待我故應千  
里獨重來

喜得盛艮山書既已作答仍附寄一詩

秋風苦無情不吹客抱開故人有情慰客抱手書卻趁秋風來  
秋風感人意千里吹長箋飛飛直下蠻中天正當昨夜夢君處  
一箋飄墜書窓前不言長相思不言久離別心之精微口難說  
惟是殷勤問學懷深愁聖遠微言絕君惠書真好音不能答思  
轉深念君抱奇生在今苦心抗志憂莫任推君助君不可得爲



君製曲援鳴琴琴中乃見文王之憂思宣聖之戒心與夫魯連  
蹈海之危節屈平沉江之怨吟志皎皎兮抗日淚泔泔兮溼襟  
惜哉此曲長欲寄聲先沉不如還修書一封秋風卻吹回吳中  
萬言細字落君几與君千里心相通

雨中

山城日日感秋深更着秋霖惱客心恐有家書來嶺外將教溼  
卻又教沉

城隅

晚步城隅徑獨諳客中人事幾能堪歸心欲上溪船去忘卻汀  
州水向南

將抵邵武

一路逢迎我非人獨是山趁晴行五邑逐水轉千灣青謝勞生

鬢頰生高士顏今朝邵武宿飛夢出杉關

同少香雪樵兩丈讌集林子魚書齋卽席賦呈時少香丈  
已定歸計

休將醒眼看乾坤孤負芳春酒一尊不值公卿惟此席適從杖  
履到閒門空庭寂歷風花晚晴日徘徊語笑溫獨恐洪塘春水  
淥江淹將爲別銷魂

重送少香丈

福州能着幾詩人漫喜先生作寓隣後會復難今日約獨留并  
送客中春江湖身賤空憂世文字交深好話貧別後干戈如不  
阻須憑手札慰情親

柬小湖有序

小湖入覲有日旋奉旨視學江蘇滢蘇人也少嘗有當世之



志名在蘇之郡學既三應鄉舉不遇今病矣不復自振明年  
屆試期當以遊學自解實不敢援朋友之愛濫竊品題此區  
區所守惟知己諒其非矯耳又去冬倦於襄校辭去幕席今  
亦不能勉從蓋積勞既久而性之疏懶者然也因作一詩奉  
柬聊以道意即贈別云

吾鄉昔有彭甘亭白頭坐困一監生有人令出我門下卻棄鄉

舉逃時名

甘亭以監生應鄉舉不入相知者典試

又有詩人黃仲

則作客英年好遊歷笥河學士渴愛才挽袖留之留不得

朱笥河

士視學安徽延仲則襄校人追之不及吾生不能學古人聊學者不合買舟徑去笥河遣人追之不及

二子全吾真窮無意氣慕榮達病厭奔走甘沉淪向來與君相  
識新此意今在臨歧陳青山一路冬入春畫船插幟寒溪濱君  
行我住隱顯異他日惟堪交以神

### 王叔蘭見過有作戲贈

王子困在家方願旅食游天涯江子天涯久旅食願得歸家貧  
亦適因勸王子且安命骨肉團圞猶可慶鑿我思家愁欲絕好  
忍饑寒莫離別王子曰不然人間難忍惟饑寒離別豈無一日  
了饑寒困人直送老暫將離別救饑寒骨肉他年庶長保我曰  
離別愁殺人饑寒雖切獨苦身况如我已離別久豈救饑寒一  
二分不救饑寒悔離別尙未離別方羨君江子與王子語意甚  
相左其實此二端人生無一可居則饑寒出離別正如前有刀  
兵後水火饑寒之刀兵離別之水火同時并力攻一身可憐王  
子行如我窗扉忽開寒風北來冷齋夜語不銜酒杯二子此時  
愁徘徊安得鬼神暗爲輸橫財窖金出地如山堆療君饑寒止  
其出免我離別資之歸即焚此詩勿傳世恐使窮士讀者心生



哀

述夢寄元潔

夢與屠元飲走謁潘先生途遇楊元潔遂作三人行元妙觀西路一直復一橫轉過臨頓里乃造先生庭有客先在座野貌臞而清見我莞爾笑曰惟沈秋卿先生動顏色喜此四客并四客留一齋不記齋何名壁懸彥冲畫寒林仿李成先生指謂我此子吾心傾頃嘗約其來當聞敲門聲果然彥冲至俄聞晨雞鳴雞鳴夢斯覺感逝心怛怛嗚呼夢五友四作空山瑩秋卿與彥冲均死歲在丁潘先生繼歿壬子之嘉平其明年癸丑元飲又入冥痛此十年來故里凋賢英惟一元潔在白老蘇州城死者不可作生者含離情我今垂四十久客身飄零早衰驗齒髮膝下無孩嬰感傷朋友事難獨登遐齡人生處宙合七尺非真形

脩短均一死身外空求營因詩告元潔歸不須田耕

建陽旅夜

兵塵千里客踪孤建水留人緩去吳尙幸賊邊存老友不知詩外盡窮途涼宵秋霽三更月古堞寒啼一夜烏便說先生壯心在明朝青鏡笑頭顱

途中漫賦

秋風又此送年華驛驛青山望轉賒歸客途中過白露野人籬外見黃花及時筋力憑誰惜無用文章敢自誇正憶江村故人語世間最好是桑麻

前蒙彭表丈賜詩有湖山早入詩人夢之語又寄一聯云

大好湖山供吏隱無邊風月暢詩懷因書一絕自贈

官雖買得計非癡饒箇西湖慰賤時比較東坡偏有福吾今宰



相許吟詩

一曉起頗寒憶羊裘有作

西風不貸客中身寒氣朝來一倍新  
頗憶鄰牆質衣庫敝裘留暖待何人

晚至孤山

誰說吾生自有涯彫年相促不還家  
坐縈千慮書難把來到孤山日又斜  
拙宦初無禦寒具野藤偏有忍冬花  
衝風獨立蒼茫極雪意漫天噪萬鴉

贈呂鴻

歸係紹興老弁曾在甯國營次有功調未得獎敘今護送餉銀與予同舟

殺賊提戈君甚武揮毫落紙我能文  
我於鄉舉不登第君在戎行空著勳  
汗馬猶然憎命達雕蟲那不枉心勤  
書生壯士堪同慨并付湖天薄暮雲

遇朱象山

台符

夜話感賦

君行間道常遭賊我受奇窮等被兵  
惟死未曾經歷耳異鄉燈下兩殘生

由福寧歸至福州道中雜題五詩

筠車嘔啞山日曛斷岡一折徑路分  
犁田見諸屋廬上春米隔著篁竹聞  
百泉爭瀉并爲澗連峯一截半入雲  
行人試撐油紙繖其雨其雨禽言云

冠箱衣褚爭牽扛青山斷處人聲哢  
向船喚渡水答響看鷺孤飛影作雙  
行蹤忽到長溪縣煙波似我吳淞江  
當前歎服老漁子不以千金易釣缸

似煙非煙霧不開我如陟彼山崔嵬  
千峰萬木雨中立懸泉奔瀑雲邊來  
日之夕矣僕夫怨客何爲者居民哈  
看取菴僧閒處

近代詩鈔

江湜

十



走一雙鞞角印蒼苔

朝陽破霧升危岑下照隔溪高樹林巖巒看成着色畫松泉奏  
得無弦琴一鷗鑑影田水活萬竹捎雲澗戶深行泥叱犢者誰  
子居山正爾無機心

疊嶂鬱作羣山雄百里不復風烟通舉頭青冥看鬱鬱倒景雲  
壑凌空空幾盤足躡飛鳥上斗落身在寒溪中雞聲人語又一  
境試顧翠壁蒼烟蒙

雨窗睡起寄懷汪先生

棟花開時梅雨零檐滴日作糟牀聽鳩鳴屋山蠅聒庭上壁蝸  
涎繆篆形戶樞蒸出菌數釘書牕生醜劍生銑寓公避溼門半  
扃毒氣薰體兀不醒憎衣衽延厭食腥勑繙卷册捎乾螢那復  
居敬常惺惺頽然支枕面漆屏撥鑪燒朮煙穿櫺助以艾納發

微馨無端闔眼飛心靈夢升君家故屋廳縱譚劇若翻滄溟倒  
腸爲我說六經擅稽異字加考訂君之舊學夙心銘夢中側耳  
無聽熒覺來懊恨神不寧僂指石交感晨星沈君宰木竄鮑鮪  
劉君醉魄復沉冥嘉言遺稿空典型終天不成化鶴丁與君各  
度卅餘齡宜及未老致叮嚀相鐫以道爭礪硯况我輓如水汎  
萍陸車嶺轎江湖舸隨身柳栗同矜屨耳際定欠要道聆深愁  
擿埴譌哇叮君其屢書附飛翎匹諸骨肉常眼青

難得

從人唾面婁師德避客揮拳劉伯倫難得蕭齋成獨坐相看蠻  
樹着濃春

彭表丈屢賞拙詩抱愧實多爲長句見意

筍輿篾舫兩年間苦調勞歌不盡刪豈可向人獻窮狀

山谷云  
詩來獻



用窮其意此更令讀者損歡顏讀之滄浪言孟郊詩旅懷伊鬱孟東野

句律清奇陳后山他日無成還志短詩名幸與二君班

龍子方鼎屬校詩集附詩為報

龍翁家住大江右筆下故挾江潮聲卅年南北噪詞賦老去一  
集新編成攜來雲間仍韞匱不以珍奇駭時日客窗邂逅手示  
我謂是詩人必能讀怪翁氣壓萬年少筆力猶能開窾奧誠齋  
放翁兩集傳本以耆年得深造翁今齒宿意甚新天與之壽多  
精神他日續編彌絕倫愧我少年負虛氣安欲破體凌前人

寓齋雜詩

履聲轉牆角知是龍翁來翁年六十九健步如童孩就讀我叢  
稿絕歎曰奇才吳中固多士領袖惟君哉急起掩翁口公何言  
之詠吾吳仕國也歷科多元魁館閣凡數公照世如三台下亦

有名士時望高崔嵬獨湜甘自棄未老先摧頽攀天仕無路安  
土家無財在鄉最不肖比于塵埃灰

晴窗摹法帖筆工來相挑投我定名筆曰兔之紫毫搨此膽試  
策入京名聲高因之得吹拂借翮高翔翺一登翰林院物物皆  
俊髦君何擇筆誤獨取於雞毛字形若風漢鬱律闌不牢以此  
憎于俗為藝知徒勞會看人與字一例埋蓬蒿筆工既辭去竟  
日心忉忉其詞太相逼其意餘風騷唐世舉子入場嗜利者爭  
為紫毫硬鋒其價併售名

名曰筆定

近年

近年手創一編詩脫略前人某在斯意匠已成新架屋心花那  
傍舊開枝漫愁位置無多地未礙流傳到後時要向書坊陳起  
說不須過慮代刊之



阻風北庫鎮

風水不必多咫尺阻歸里况茲具區旁澤風以夜起重陂疊寒  
浪恨不送船尾坐看水着天浮地如一屣空處蓬蓬然岸竹困  
披靡拔我所插篙夜泊凡三徙那無村醪沽盡醉亦愁裏孤懷  
倦客遊暫歸且心喜家累迫歲闌欲速自難已風伯何不情相  
欺直如此孰爲風伯言歸楫使得理如渠再出遊乃以惡風抵

歲除日戲作二詩

庭角無梅座不春門扉雖闔豈遮貧晚來雪屐鳴深巷半是吾  
家索債人

有人來算屋租錢小住三閒月二千使屋如船撐得動避喧應  
到太湖邊

席上有作

老饑相抗此生中忽有杯盤速寓公七萬二千終喫滿隨緣且

在泖之東

明日與老饑相抗係辛敬之語見中州集百年七萬二千飯宋人饒德操句也

吳中喜雨詩寄彭表丈

莫道神龍不自強力興雷雨敵驕陽欲爲百越洗兵馬先遣三  
吳菽稻梁農戶漸安南畝業書生也受北窗涼如公亦舉爲霖  
手豈直區區霑此鄉

舟中二絕

浮生已是一孤舟更被孤舟載出游卻羨舟人挾妻子家於舟  
上去無愁

我向西行風向東心隨風去到家中憑風莫撼庭前樹恐被家  
人知阻風

溧陽道中因懷孟東野有作

近代詩鈔

江湜

十三



溧陽有相國去今垂百年官階雖有紀富貴淪荒煙我懷溧陽  
尉世遠人差賢吟詩有遺處過客爲流連況我正遠遊吟君遊  
子篇春暉不能報泣涕方漣漣因思君在日亦墮江湖邊旅塵  
梳下髮客衣凍折綿常爲路旁食苦腸中盤旋出門輒有礙夜  
抱孤心眠或病委僮僕吐詩無人編旅塵下八句皆點  
次東野本集詩意凡君之  
旅况今在吾目前卽疑君之身是我前身焉嗚呼士寒餓千古  
猶比肩後此豈無人讀詩復我憐日暮投金瀨流水鳴濺濺寄  
語史相國士窮良由天

### 新年憶幼時二事

憶昔十一齡新年入里塾童心慕嬉遊塾師與束縛時有小聰  
慧偷看本草熟復取火珠林占法學郭璞塾師見而怒童蒙以  
正告曰汝宜學儒儒非醫卜屬出治比伊呂入聖辨朱陸摛文

仿班揚詰經守鄭服用是顯於時潤身兼潤屋因授一編書實  
維四庫日日隸五萬卷卅年始竟讀不料讀竟時得官由入粟  
粟少官苦卑用世等輿僕卻憶所讀書滿胸自捫摸一字不入  
用好付高閣束因疑四庫外有書弋利祿師獨祕不傳我故昧  
所學所學非所用固宜窮且辱師誠欺予哉一誤萬難贖何如  
弗領教小志就醫卜

### 由常山至開化折迴江山凡山行四日共錄絕句

我要尋詩定是癡詩來尋我卻難辭今朝又被詩尋着滿眼溪  
山獨去時

一谿綠得可憐生不是瑠璃比不成及到前灘驚瀉處瑠璃忽  
作碎時聲

夜氣沈山一色中月光和霧只溟濛猶賒十里向城路試膽危



橋過水東

油菜花時麥未秋山中欣見小平疇飛泉正去尋谿澗忽被春田一岸留

谿水因山成曲折山蹊隨地作低平谿山滿眼君應悟直道如今不可行

四山環匝似城頭又着重山繞一周不是沿溪尋得路被山圍住幾時休

修路環谿十里強籃輿搖兀似車箱坐吟渾忘斜陽晚只見輿夫影漸長

炊煙一穗起茅檐霽色遙看夜色兼日脚斷無人趕及倏從平地上山尖

爭落爭鳴怒未休山中水自不停流看渠合勢同奔處卻解分

波避石頭

夜行七里瀧既而月出因登釣臺紀以長句

正月望後嚴州行因事一入嚴州城出城已見西日傾下船不敢盲追程前有七里瀧山峻水益清夜行若無月恐負山水情不知舟人是何意拔棹撥棹爲宵征是時月在東嶺背水色稍借天光明兩邊山影落篷脊壓船若重行還輕順流屈曲三十里水風激激吹波聲忽看嶺上一輪吐低昂若與船相迎一輪復從水底見水底嶺上爭光晶奇哉富春夜山色皎如雪後天初晴心知好月不恆有清光猶爲嚴先生先生釣出漢時月一臺高與浮雲平登臺看月發奇想安得詩客相酬賡南宋謝臯羽晚唐方元英若呼二子共良夜豈無佳思通心精人間糞壤尙傾奪餘此清境無人爭舉頭得月俯得句造物着意還相成



何當瀧水變酒醉我倒更忘身後千秋名

湖樓早起二首

面湖樓好納朝光夜夢分明起輒忘但記曉鐘來兩寺一鐘聲  
短一聲長

湖上朝來水氣升南高峰色自峻嶒小船看爾投西岸載得三人兩是僧

子長作西湖圖見寄以詩奉答

顧君偕我來西湖歸去急寫西湖圖西湖之景因我得圖成可  
贈他人乎果然寄此幅水墨雲模糊南高峰高孤山孤湖心水  
色平平鋪中有一船依茭蘆船中人非白與蘇乃是落拓今之  
吾吾遊西湖復入畫此身信與天爲徒天方以湖慰孤憤使發  
笑傲於窮途顧君會此意所以點筆粗不寫春堤妍麗景只作

老樹依崖枯惜君寄畫爲我娛不知我窮但有七尺軀客中之  
屋無錢租家中四壁今亦無得君此畫何處挂蒼茫四顧空嗟  
呼嗚呼西湖之圖懸之臥遊不可得吾還去遊真西湖仰天醉  
酒歌烏烏

子長復寄韜光圖又成一首

韜光本有一圖  
係瑛夢禪作

韜光禪師坐禪處其地今以韜光名徑幽日聽風竹響山高遠  
見秋潮生顧君從余一登覽滿胸畫意先經營山中舊藏一圖  
在僧指作者人姓瑛君歸卽仿瑛老筆皴法瘦硬山縱橫是宜  
卽送寺僧去與舊一圖爭誰精題詩紙尾卻寄我使我感歎愁  
冠纓世間好境須身住重在山水圖爲輕韜光僧如得此卷妙  
有真境相發明而我住山不可得抱圖悵望空含情此如鰥夫  
慕佳耦卻聽隣舍釵環聲顧君顧君若畫我先作一座杭州城



城中潭潭達官署署中一士依寒檠破窗塵几積公牘窗外來  
者奴僕并但愁此圖人笑倒齷齪更使山靈驚明朝移文勒巖  
谷並阻韜光寺裏行

有弔而作

東南初動十年兵知待何年再太平君去泉臺須緩步轉輪莫  
卽到來生

詠悔

翳桑此日餓卑官悔不從軍學據鞍殺賊未能爲賊殺猶將殉  
難免饑寒

清俸叨分卅萬錢當時何不買閒田一官此日看人飽處處村  
莊大有年

靜修詩

昔陷杭城時生死呼吸間雨塗走破踵避賊投無門尙記橫河  
橋古廟朱兩閣半開得闖入一僧寒鴟蹲示以急難狀情迫詞  
云云僧爲惻然涕飯我開小軒佛廬數椽外寂寂唯荒園是夜  
天正黑雨重燈窗昏園中嘯新鬼什佰啼煩冤數聲獨雄厲知  
是忠烈魂昨收繆公屍徧體叢刀痕在官受其知時又參其軍  
悲來激肝肺不忍身獨存佛後有伏梁可懸七尺身是我畢命  
處姓字題於紳不虞僧早覺怪我倉皇神尾至見所爲大呼仍  
怒噴問有父母耶胡爲忘其親勿死以有待乘隙冀脫奔猶可  
脫而死徒死冤難伸百端開我懷相守至朝噉遂同匿三日幸  
出城之闔僧前我則後徒步同勞辛道聞杭州復收悲稍歡欣  
僧還我獨去分手鴛湖濱我歸見親面先將此事陳我親便遙  
拜感此僧之仁曰汝一日生是僧一日恩他年莫忘報屢誠詞



諄諄豈知不數月蘇州隨陷淪在逃哭慘計久阻歸築墳親恩  
抱深痛他恩何足論荏苒二年來轉徙今到閩又聞杭州破餓  
死十萬民我於萬民中念此僧一人憶昔於汝飯見汝徹骨貧  
安有圍城內能繼饗與飡早欲裹飯去千里迷兵塵昨宵忽夢  
見破衲嗟懸鶉疑汝未卽死竄身在荆榛古人感一飯重義如  
千鈞况於兵火際救死出險屯何當遠尋汝相挈同昏晨終身  
與供養如汝奉世尊慘慘吳越天擾擾盜賊羣此懷焉能果負  
負心空捫豈惟負汝德並負親之言作詩誌悲痛字向心中鐫  
汝名曰靜修杭人俗姓秦書此埃有後遞告子若孫

題戴文節公山水小景

疊嶂前頭石氣青萬松積翠擁危亭亂來人不貪多壽誰向深  
根問茯苓

露無聲處暗香飄寂寞憑誰韻短簫照盡人間離別事月於秋  
夜自無聊

索書

索書未是知書者強試爲渠數十行見役此心方作惡既書得  
意又全忘秀難掩弱憐元宰熟始呈能陋子昂此手何當殺賊  
用漫同古墨鬪豪芒

園草

夏園叢惡草雨後長於人不惟礙行步並藪蛇與蚊去之命兩  
傭治地東西分一以腰鎌來芟薙疾若神一傭徒手作拔葉兼  
拔根薙者日一畝眼底俄然新拔者半畝止爲效難償勤勿嗤  
拔者拙雖拙志不紛一草用一力正如農夫耘彼薙者根在如  
今之用軍驅賊不盡剿滋蔓旋害隣君看薙後草卽日回陽春



海天一首

海天暑氣錯亂催昨晴而雨今晴雷芭蕉一風葉卽破菡萏六月花初開故鄉夢裏失門巷獨客杖底空池臺將身何日是歸日時倚石欄吟百哀

雲樵丈見示近詩奉柬一首

燈前千古意搔首爲斯文天豈獨窮我人嘗欲殺君有詩堪送日何事不浮雲想見清吟夜秋聲空外聞秋能聲衆寂我輩亦吟詩天籟還人籟君知與我知平生今已矣後世孰傳之相顧顛毛白烽煙徧地時

擬寒山詩二十首

江南有富翁認錢作主人將身爲之奴服役不憚勤一朝陵谷變錢爲盜所有奴乎失其主身如病狂走

張三作竊去忽建六纛回李四擁八騶新自爲賊來天地樂包容誰論才不才有口欲談之不如銜酒杯書生苦好書終日仰屋梁飢來不知憂謂有禹餘糧禹糧是虛名誑此文字腸腸空衆穢盡軋軋方成章我生無一椽亦無錢賃屋然計四十年無一夕露宿始悟人有身不須居是卜壁上黏蝸牛彼方累於殼古墓犂爲田培田築爲屋墓中人有知爭地且興獄所幸今古隔各不知誰孰天與平其爭日月如轉轂妻不共甘苦在家如作賓小女性差慧食貧知習勤勿以女爲喜而對妻作嘖相與有瓜葛均是夙世因隔於一夕睡昨日如前生明日亦如此今日空含情由來造化鑪不鑄長生形君看白日落君聽黃雞鳴



牛哀化爲虎一人已不祥今看百萬衆同日變虎狼虎狼再爲人知復在何日合掌讚荀卿性惡是鐵筆  
僕持客刺入主人怒其僕何不爲我辭勞我具冠服出乃握客手若恨來不數相對笑嘻嘻誰知真面目  
東家一兒生西家一翁死同時聽歌哭去來分彼此勿爲翁去悲勿爲兒生喜出入造化中當有先後耳  
鐵船泛天河萬萬無此理耶穌欲行教豈但鐵船比世變浩無涯誰能究終始西北有高樓今在東南起  
良玉產于闐華耀美人首美人作黃土忽已百年久玉有再出時人誰骨不朽當勸好色人生前但飲酒  
英雄遇惡少胯下有匍匐惡少買得官我與爲僚屬雖無胯下形豈免七尺辱南山有樵夫長歌狎麋鹿

盜來入富家未免凶殺人富家子如盜相害還相親凡物當去時必以人爲因所以漢魏朝認賊爲良臣  
欲撈水中月因鑄黃金盆人情愛浮華物力何足論可憐錦繡里俄成草棘村誤他春燕歸難覓前年門  
向民括兵餉如向羊徵裘裘乃羊之皮剝割羣羊愁不知餓虎來羊亦不自謀貲財賊掠盡颯颯空村秋  
眼見一種人親身被盜來卻學盜之道獵取人間財太行與孟門在胸高崔嵬人心亂後險天運何時回  
佛見路旁金呼爲大毒蛇貧兒不之信囊取歸其家被人指爲盜誣治楚毒加始悟佛言是蛇者非金耶  
狐千年爲人人千年爲仙人狐共學道難易懸殊焉然人嗜欲紛而狐心專一有狐變人時無人作仙日



楚王請熊蹯不知祿已盡祿有未盡者翳桑遇趙盾祿籍誰所  
司不令人先知先知斯息營如在懷葛時

八弟自福安至始與二弟六弟相見同集燈下寫此示之  
弟兄亂後聚而喜喜卽是悲悲不已淚眼看燈暈正紅照我四  
人如夢裏昔年離散亦如夢誰料天涯生再共四人此時猶一  
人并得四心成一痛浚弟早衰浩弟羸侵尋羸者又將衰獨汝  
行年未三十待得時平能有爲江南諸將方攻賊戰伐秋來斷  
消息不知何日克蘇州收箇空城計也得朔風蕭蕭夜氣涼旅  
魂最苦關山長餘生無復四方志但取生時還故鄉

湖坪嶺遇雨

昨宵臥聽雨滂沱晨在湖坪嶺上過試看空濛一雲海近迷榮  
确幾山坡此身如入米家畫無福能披耕者簑入店烘衣看老

嫗渠無春夢也成婆

野寺

人烟在澗西野寺獨巖棲拾級家初上對門山漸低蝸涎僧壁  
畫蜂穴佛身泥全盛乾隆日人名碑側題

塢山寺

子影棲於寺閒官本似僧但携書百卷莫辦酒三升午後潮痕  
退晴餘鱗氣蒸茫然向海若何處去催徵

海場地有淪入者故云

將重入雁宕過大芙蓉村作

此心空與龍湫約何日能營宴坐亭海上棲身愁客抱雲中招  
手有山靈醉拖方竹杖而去拄過大蓉村乃醒百二奇峰原舊  
識一時飛到面前青

過淨名寺循鐵城障而行深入二里靜憇有作

近代詩鈔

江湜

二十一



誰造淨名寺嵌入絕壁內對門又絕壁鐘聲不出外寺旁一徑  
通徑裏雙壁對壁上一綫天天小谷反大內多珠簾泉匯流不  
成瀨陰草作寒青可給仙者佩遊山必擇幽幽以此爲最我欲  
窮其深並出石壁背足怠選石坐坐處尤可愛數聲山樂官不  
是人間籟

山樂官鳥名其鳴如  
作樂惟雁山有之

### 秋夜

颯颯涼颿吹滿林海天殘月正斜臨隣童讀得學而熟鄉夢醒  
來夜已深獨坐默思家世事最疑爲善聖賢心

此范孟博語

東吳此

日遺黎集腸斷天涯滯客吟

### 昏昏海氣中一首招黃生

夢香

昏昏海氣中略辨村前村秋風動禾黍野散雞鳧豚畸零數家  
聚不通城市言豈知中有士悅學牢閉門築樓小三間積書恣

幡帑釋書倚樓望所見惟田園昨來詩一篇詞筆何瀾翻正如  
盈尺璧價高不待論磋磨以朋友即可獻至尊維天生美玉豈  
獨於崑崙通都填俗儒議論浮無根我見亦多矣似非心所存  
所以期之子更來窮詞源兼豁此羈抱一洗鹽場喧時當重九  
後草衰日尙暄棹舟肯枉顧申發到未昏我有龍湫茶一啜清  
心魂惜此海之堦鹹氣使水渾已汲遠山泉足以代酒樽但勿  
懷刺來寒寓無司閤

### 又贈陳生

諧

我以學致窮今老更無奈尙教人讀書大似不相愛然遇一士  
佳不禁勸之再譬如嗜酒人見人飲亦快翁洋有陳生近在一  
里內十步有芳草是芳即可佩今溷魚鹽鄉已似雜蕭艾勉彼  
益讀書乃以家貧對我意大不然笑其所見隘貧乃士之福飢



寒資磨淬古來英傑人激發凡幾輩富兒握牙籌多藏作災怪  
金氣錮終身不貧反是害生時聞我言意氣一慷慨歸去仰屋  
梁屋若爲之大從此金石聲淵淵出牆外

舟中望孤嶼作

又看孤嶼在中流雙塔凌波勢欲浮天與甌江自千古我思謝  
客不同遊潮平別浦帆初落野闊孤飛鳥亦愁鷺地鄉心來一  
片明朝題上孟公樓

眷口自福州至溫今日挈來翁洋時二弟已航海回里以

二詩寄懷

挈眷今朝信使回寓廬門對北風開別無家具隨身到使異流  
民就食來卽日米薪愁瑣屑在途烽火幾驚猜時危正要憂天  
下數口飄零未足哀

亂來何地可爲家不及門前一樹鴉鴉有定棲同日夕人今驚  
散各天涯滄波路遠牽魂夢薄宦心違足怨嗟念汝歸尋舊閭  
里江城十月雪如花

夢歸

不知此去返江鄉千里須經幾戰場野是荒田稍村落市猶焦  
土未垣牆叩門訪舊應迷路出郭閒行有廢梁幸是夢歸非實  
歷真歸爭免斷人腸

雜書絕句

早歲耽吟興不孤惟愁門外吏催租只今身作催租吏敗盡人  
詩我亦無  
計米愁薪數到茶開門一日不容差鹽官自食官鹽了他物還  
愁何處賒



恆苦坐衙無應者心知吏卒盡歸農官今也好歸農去山隔家鄉一萬重

雪後江行晚至館頭驛

白鷺前飛炯一雙犯寒客自拓篷窗望中前日千峯雪天半消融入此江

今日寒晴日小黃天風着意送歸航東山雪盡西山白自是西山背夕陽

觀兒戲

今日天氣晴遊興我自休飯後聊倚門看彼羣兒遊一兒持紙鳶向空而上投一兒牽其絲反走絲自抽左牽過屋角自信風和柔忽然一翻落挂着高樹頭再牽一絲斷悵望雙淚流頃之復嬉戲爲戲終無憂感我憶兒時獨被書齋囚春風日招我出

門難自由欲知紙鳶狀幾以夢寐求爾時受拘管豈自知藏修亦爲讀書成當比他兒優忽忽四十年萬事徒自尤自尤亦何益且以詩自酬鄉里有小兒今方爲督郵

一風

一風撲案來掀我筆下紙執筆書不成將謂窗正啓呼僮急下窗風卻在屋裏亂翻滿架書策策聲不止其有零篇飄已落案之底拾來鎮以物未鎮者又起時欲執筆看苦勞左手抵彼風不識字又豈解書旨無所爲而然相翽太無理吾那與風爭堅坐待其已

石門觀瀑布

山靈謂我曾在龍湫行見此石門之瀑將心輕特乞天公三日雨添波入瀑十倍傾果然瀑大壯一白劃破青山青萬斛之源



千仞勢春落潭底潛龍驚後水擊前水水怒益不平爭翻白浪  
躍復鳴合作戰鼓兵車聲赴阨突石急溜成去勢迅若風無形  
自非一門趨谷口雖以天地爲壑猶將盈我面瀑泉立耳聾目  
眩心怦怦倚巖定步不移屐恐被卷落輕吾生舉頭何所見但  
見高壁落落天冥冥天開此境足自表豈待謝客方知名興來  
直欲呼山靈此瀑勝處吾能評如立支川直注海如漏銀漢懸  
秋清聲吹鬼神白日下又如地底馳雷霆獨無飛空夭矯之幻  
相與夫煙雲離合隨晦明是則難與龍湫爭

晚望

便有風光何處遊出門一日盡沙洲海山日暮暮雲起卽是蓬  
萊不可求

桐廬

桐君昔采藥無藥醫世亂所以桐君廬亦爲賊所竄桐君固邈  
矣其地乃塗炭向時萬家邑瀟灑在西岸村靜響機春林疏翳  
舟爨地接嚴陵灘山水清可玩方願卜隱居豈謂民離散兵火  
又饑荒如今死者半我昨嚴州來兩岸人煙斷青山隱孤舟落  
日愁猿喚望望山之顛尙有破壘冠官軍戰賊處白骨棄無算  
寄語黃子久須將畫本換此日富春山傷心誰忍看

續擬寒山詩二十首

人有欲貨錢與人聯族譜及乎錢入手此譜棄如土亦有孫與  
李結盟爲酒肉明朝酒肉盡孫死李不哭

眼見慕勢人求入不可得利彼體生痔而以舐樹德凡事非人  
情此中最叵測要離妻可燔樂羊子可食

百年以上人若從故下起所見惟曾孫其餘盡死矣如此則大



悲將謂不如死是以天生人限以百年止  
一人力種粟夏耘如火煎一人坐而飽食粟盡百年彼苦此何  
樂原有前世緣我以道眼觀均之爲可憐  
眼前荆棘地昔年樓與臺同樂歌舞人過之能弗哀哀者方駐  
足適有仙人來笑他生世短但見此一回  
利欲錮人心如熱毒在腸一遭大患難猶飲巴豆湯瀉之毒斯  
解先得心清涼十年讀書功吾知未足方  
瞽者擿埴行導路以竿木竿木揣得處便可進其足妙在目無  
見以竿作之目若是有目人反有窮途哭  
魄強記誦博魂強箸作精有種昏愚人魂魄如未生獨逢金銀  
氣豁焉心內明雖然莫笑他未礙爲公卿  
某甲善狎邪能得名妓意妓以名故驕事之良不易百端既盡

驢其術蓋已祕某乙竊學之入官爲能吏

杭城絕糧日食狗無一存到今百里內得狗如獲麟因知狗雖  
賤亦要生逢辰哀哉城外骨昔日城中人

今生人食羊來生羊食人人羊互相啖冤報常相因眼見凶惡  
徒噬人爲膳羞我作轉輪王爲爾來生愁

巴蛇欲吞象豈自量其腹萬生渴貪利竭海不盈慾天爲不及  
生海爲不及育所以大亂起餘災被草木

前聞金陵城外百  
里無一木存者

有丐弄獼猴使猴自戴冠跳上白狗背馳作白馬看及丐釀人  
錢猴乃分餘餐猴乎爾何愚大似今之官

使小人變法而君子守之荆公誤蒼生其誤在於茲寄語宰官  
身慎取在學術學術殺人時比於水火烈

羣狗臥中庭主人叱其一俄看被叱者已爲羣狗齧主人夫何



心豈必怒而叱狗眼看人時揣摩一何疾  
郎有別歌姬垂淚簌簌羅巾染薑汁背郎拭其目薑可以取  
淚錢可以買哭望夫化石人不住黃金屋  
奸僞遇奸僞如看瞳中人彼瞳猶此瞳互照而兩真靜居念世  
態可笑不足噴終當入山去木石堪相親  
搜揚秦漢石懸購商周金富貴有餘貪向茲嗜好深古行重仁  
義古語皆規箴試問諸好古何如持古心  
波斯匿王面一年一年皺人無再少時如日無兩晝枉將露電  
身欲借金石壽惟有青草塚許汝必成就  
寄書與死人斷無回書來致人貪癡心作計到夜臺磨錫作金  
箔剪錢爲冥財冥財何鬼得只益人間灰

舟中雜有感發以元遺山書生只合在家貧爲韻作七首

弱齡昧生事依約荒江居忍飢頗劬學挾策侶樵漁至今江村  
中有我當日廬去之始數年竟欲親舟車事遷情亦殊興懷發  
長吁豈不嗤較薄但爲飢所驅憂來斷高興還窺古人書宿好  
知未乖此生定焉如

苦心爲形役大塊勞我生榮枯眩眼前轉戰傷心兵烏知百世  
下但存賢愚名萬事隨驚波一蕩還太清古人有當年吾已惜  
其情今何不自己實欲冀有成凭窗發遙悟矯首心神醒沙禽  
亦何知自刷風中翎

一窮屈至情懷役中夜起親慈坐相奪憐我不得已君何苦相  
望乃不諒人只我豈便忘情欲言恐已鄙飲水候寒溫莫如辨  
諸己一息君不知今況隔千里端憂溯明月扣舷淚如洗勿謂  
予不信有如黃河水



客情滿千里日夜河流急西日已蒼然征鳥不遑集登艫眇淮  
甸坐看夕陰合江樹遠迷離目斷幾原隰殊鄉常畏人孤抱暮  
愁入懷哉朋舊歡渺矣隔鄉邑思君屬荒夜初月照久立安神  
閨房中倘念征途怯

詩書生寒苦寒苦生慷慨慷慨一出門此生謝耜耒未知今所  
從徒然困智慧黍地誰獨耕夕曦炙其背此人誠苦勞庶免世  
網害物情互欣厭孰能審所在乘車下澤中策馬萬里外勞逸  
慨難齊意與古人會

啞啞鳧雁羣泛泛水爲家船來自驚起飛作一行斜渺然念人  
世耳目多紛華吾生也有涯而知也無涯苦將一豚蹄滿車祝  
汗邪此間亦何有空曠差無瑕颺颺川上風較波走平沙背篷  
時有人日晚收釣車

船行岸不知船自低昂頻卻見岸低昂惑哉船中人因知世人  
眼眩轉多失真平生聞道淺未免傷賤貧亦思早達者所憂更  
多門取舍交戰時一悟理自伸悠然開一編頗欲忘夕曛凱風  
亦時來適我無非新

嶧縣有作

道經嶧縣五月初大麥既穫小麥枯誰家腰鎌千指俱載以牛  
車童是驅偶隨之行至村墟有場百步新滌除一翁先在掃麥  
鬚碌碡倒臥閒有餘打麥連架懸屋隅睭之且復立斯須愕然  
而顧翁見予客從何來經我廬知爲士人見待殊延坐入室罄  
區區不嫌其真我亦迂有口能言聊與娛翁家多田連郭郭食  
有魚麥出有驢築室聚族居不孤入門怡然對妻孥萬事粗足  
何所圖欲其子之士大夫更潔脯糒延里儒穴牖納明兒讀書



大兒客至能拜趨蔚然儒雅充其軀云此最弱難勝鋤願因學  
仕其可乎心愧其言心歎吁以耕資讀吾不如人生無田行次  
且代耕非分苦覬覦遊宦不成飢可虞曷若翁家善菑畚日曠  
別翁情不舒何由卻作農家居

曲阜雜詩四首

周人行籀篆先師用古文亦如韓退之性喜書八分惜哉尙書  
出未付博士論安國僅能讀史遷一諮詢既遭巫蠱事千秋當  
失真晉世忽傳布茫昧難得云穆璧責諸江軒鼎來自汾僞書  
亦多有六韜與三墳我今面孔壁絲竹難重聞

闕里與陋巷相去如尺咫當日兩家風同飲一井水同飲亦同  
樂心源無彼此由來聖可能好學斯具體淺哉太史公但云附  
驥尾祇今陋巷中寢廟翼然起卅年事篋瓢千春饗牢豕漫有

往來人一心爲悲喜

禹陵托稽山舜墓在南紀聖王或野死不必葬鄉里先師本旅  
人晚歸教諸子梁本雖自槐彬彬在後起當年大冢旁歲時來  
習禮戰國秦漢間齊楚多遊士不聞魯諸生口舌擅長技由來  
善居鄉尙得感頑鄙聖人百世師流風知未已

道衰師不尊授受如販鬻卓哉朱程門尙有邢恕胡絃屬不惜

隳身名背師故應速惟聞漢經生門人爲持服去古初不遠失  
意尙誠慤聖門廬墓人至今有遺築萬楹非手栽神鳥自棲宿  
當年追慕心何堪喻流俗

天南一首

意興年光兩見磨天南靄霽竟如何黃蕉丹荔番番喫榕社篁  
村踽踽過鄉夢苦如殘燭短亂山甯比客愁多明朝遊子逢初



度目極煙巒自詠歌

龍巖州除夕醉後賦長句三首時將赴漳泉諸郡

亂山環合龍巖州鎖門十日不出遊今朝獨上城南樓一望兮  
萬峰起立入胸化爲突兀磊砢之羈愁歸來對燭更淒絕苦念  
明朝是元日城頭鼓角雄且哀更聞一片春聲來千家爆竹如  
驚雷火樹燄燄燒成灰此時主人醉我酒百杯蒼頭行炙紛相  
催羊腔魚尾滿案堆衆賓開口歡追陪座前蘭蕙庭前梅燈燭  
照耀花爭開不知此中樂事爲誰有客淚多於主人酒

昨夜家書來自驛母氏之言父手迹燈前一讀百歎息淚與空  
檐雨同滴男兒不能忍窮守家術乃使風霜雨雪飢渴凍勞憊  
憂愁疾病痛一一盡入老親夢家有榆樹藏烏鴉烏鴉之鳴聲  
呀呀音書此時不到家老親聽之思天涯擲琰問卜愁轉加又

况今日除夕明日元辰四時佳節更番新天機自動諸弟妹膝  
前頗解思行人牽衣挽問兄在閩屈指六年南北他鄉春吁嗟  
我生七尺身不如牛醫之兒能奉親

吾悲夫閩山之竹何不大者爲屋椽細者爲篙爲釣竿而乃編  
排架結成竹轎載客兀兀攀巖巒使我身如鷹與鷗摩雲一日  
千迴盤盤嶺路走不盡龍巖南去滄瀛近火維地荒土俗惡  
颶風蚤雨早晚作山有魑魅水蛟鱔土人以島嶼爲安居格鬥  
爲笑樂嗟我何爲去棲託况聞蠱蟲羣飛金蠶長

閩中亦有以瘴風吹作蘭花香避之土人所稱蘭花香瘴也使

人中此愁肝腸吁嗟乎人間豈無吾故鄉曷不遄歸盤與閩

彥冲畫兩雁爲稚萃所藏邀余題詩

彥冲畫雁嘗取多往往蘆根一羣宿不然寫影入遙天乙字橫



排十五六此圖兩雁靜欲鳴不孤不羣彌有情有如窮士得一  
友不能更逐儔人行昔與彥冲同里邑志合形骸尤狎習亦如  
兩雁在圖中一片圓沙走相及吁嗟乎彥冲往矣吾獨立卷畫  
還君淚霑溼

典衣買彥冲畫一幅賦詩解嘲

豈曰無衣一敝裘質錢不與婦相謀將沽官釀供朝飲卻買山  
圖作臥遊四壁尙存聊潤色百年難度此消愁君看畫手劉梁  
壑早枕青山成古邱

彥冲畫柳燕

柳枝西出葉向東此非畫柳實畫風風無本質不上筆巧借柳  
葉相形容筆端造化有如此真宰應嗔被驅使君不見昔年三  
月春風時楊柳方榮彥冲死壽不若圖中雙燕子

晚步至普照寺同金樸夫

華

市聲塞耳不能聽轉入禪林取意行寺破剩看殘佛在塔高留  
得夕陽明與君短臘同爲客卽日新交倍有情更一徜徉可歸  
去寓齋分對兩燈檠

客夜不寐

縣齋僧寺偶同城寒夜聞鐘百八聲一杵一聲無誤打是誰聽  
得最分明

岸旁

岸旁何人家黃牛繫門衡倚門一嫗立手約秤上星旁有數錢  
者放下都籃輕籃中有何物鱣鱣魚尾頰狗來欲舐舌眼向籃  
邊偵有翁會狗意打狗羣兒驚哀哀啼不止適來人買錫持錫  
與作食錫少兒還爭須臾復兒戲騎狗循牆行卻作騎馬勢以



口傳鞭聲斯時失翁嫗寂寂門初扃黃牛亦不見但聞黃牛鳴  
燈光忽出戶閃若流電明羣兒得喚入知是魚烹成我方倚灘  
爨向晚心孤清寫得此景歸不用言吾情

野興六首

無霜無雪是南中雜樹冬榮葉葉風偏是老楓搖落甚只留幾  
葉在枝紅

茶樹開花還結子世人貴茶賤其花停輿手摘寒香嗅不獨春  
芽始是茶

隔谿修竹若吾招風影參差未覺遙走盡沿溪三里路幾回欲  
渡竟無橋

岸旁掃葉兩村童仰看枝頭落未空忽地猛風千百片卻吹一  
半入溪中

日光入水寫溪苔遂有儵魚弄影來疑此空明堪掬取一魚一  
影各驚回

槐樹千年知孰栽槐枯藤欲大於槐村翁生在槐枯後只見藤  
花幾十回

送客到洪山橋有作

思歸歸未得枉自到津頭坐看相知去獨緣何事留安能人送  
我卽與客同舟愁外江湖到平添水似愁

感憶四首

靜修之外復有感憶無間存歿井  
不區貴賤各三十韻共四首云

朱述之先生

諱緒會浙江元候補  
知府江蘇上元人

浙中官累千塞破杭州城問誰能讀書獨推朱先生先生大雅  
材宰縣有廉名惟性好鉛槧不工承與迎上官見爲迂祗用參  
文衡先生亦恬淡羞與貲郎爭寓廬車馬絕交我時忘形百過



亦不厭爲愛書數楹我於杭亂後重到疏人情先生走相覓邀  
住同寒廳忽出一書授呼我使眼明日汝之詩集所幸手繕精  
土匪向市賣市賈貪微贏我見得購還首尾無飄零嗟我遘兵  
旤叢書棄兩籟詩編賴公收感極惟心銘可憐賊過後庖舍餘  
空罌先生炊欲斷忍以三口并因遂束裝別忽忽寒暑更是冬  
在溫州客有來避兵傳說先生死櫬在山陰停縣官具含殮孥  
累方零丁不知爲何事作此東浙行茫然隔烽火慟哭徒失聲  
惟念先生書百卷初輯成金陵續文獻定海編圖經先生未刻  
書有金陵  
徵詩各數十卷州昔曾諾爲序見插一架盈此時合散佚浩劫消精  
英安能去收取藏弄埃太平聊報一事德并以慰幽靈

徐仲水

名之鑑浙江題補錢塘  
縣知事貴州開泰人

仲水美少年風流事君展大吏采英聲試才任以劇我愛而規

之慮其進太亟西湖兩同遊後亦不時覲豈知患難中向人肝  
膽赤憐我并破家爲我急籌策因緣得生機倚仗出死力適有  
見擠者蜚語巧乘厄君於廣衆中詢之使語塞因亦爲人排而  
君不暇惜時我百物盡詩稿忽收得君曰此當傳誓將爲刊刻  
君時亦良窘十口衣食窄一笑漫應之豈敢爲君責明春我在  
溫遣使到我側書云宰東陽山縣極幽僻已召劄工所言踐  
疇昔請兄自刪存授使以全册留使且編詩十日手初釋忽聞  
婺城陷東陽賊已逼此事自當休勸君急守阨使還書不來兩  
月斷消息後聞人代君東陽旋陷賊惟思君去官何時得所擇  
兩浙旣全淪三吳未果克徧地着網羅浮生恐一擲今春在閩  
中避難來越客內有識君者見君海上舶滬瀆與天津不知果  
安適四海未重逢一生永相憶



二僕

章金幹而復朱升駭而馴二僕各廿歲出入長短均朱升性稍懶無能偏怨貧章金謹事我其願時自陳望我作州縣而彼爲司閹章金固差強不與朱升倫遂時鬪口舌使我生怒嗔雖怒亦不逐兩訶而俱存迨賊圍杭時二僕常隨身念渠有父母聽去方爲仁從容諭之意並與三笏銀豈知各願留涕泣見性真是時營務劇草檄夜達晨二僕亦廢睡執燭忘欠伸直至城破日隨我倉皇奔路隅走相失生死遂不聞及我重來杭章金先來云被賊擄入山逃回甫一旬朱升亦繼至頸有刀傷痕我窮既赤立衣食難推分勉留使息養隨事同憂輦二僕忽相好結盟爲弟昆相隨復三月而我獨赴溫自我到溫後隔絕兵戈塵前聞越州陷二僕皆越人觀其事主意終保爲良民斯世方鬻

官儂薄參簪紳彼僕獨長厚履險生忠勤愧我有何德致此夫何因思之亦作詩不以貴賤論

陳樹南丈

諱杞江蘇江寧人

在杭徐仲水在溫陳子餘平生患難交古人有不如子餘兄事我館我備百需其叔樹南翁關愛尤勤劬翁家江甯城陷自咸豐初時談破家狀簌簌老淚俱推情乃憫我慰勸時喁喁及我得凶訃遘慘古昔無翁聞急走唁駭愕相持扶恐我竟昏迷不去朝至晡遂爲製衰經舉哀借僧廬始終見矜恤古誼敦薄夫明年春和時翁思山水娛見我日哀戚示以雁蕩圖遂拉同徧遊龍湫與雁湖記宿靈峰洞在山慨世途翁欲葺一庵留伴僧之孤此懷惜不遂歸後秋夏徂變生隣縣賊入郡來吞屠署深官在鄉倉卒非所虞踰垣我僅免翁竟非命殂伏屍爲一慟清



血霑衣袂可憐昨夕飯同席猶相呼嗚呼兵亂來天以人爲芻  
斬刈到仁善同禍無別殊吾親鄉里望萬口推醇儒千善不報  
一遇賊仍捐軀卽如翁爲人恂恂而和愉深情恤我喪豈非仁  
者徒眼觀此慘酷天道如是夫

近代詩鈔

金和

和字弓叔號亞匏江蘇上元人邑增生有秋蟪吟館詩鈔

石遺室詩話粵寇淪陷金陵亞匏舉家在賊中謀與官軍應不濟幾及於難遲之又久僅而次第得脫黃小已強半凋喪矣所歷危苦視古之杜少陵近之鄭子尹蓋又過之其古體極乎以文爲詩之能事而一種沈痛慘澹陰黑氣象又過乎少陵子尹世皆知子尹之詩之工而罕知亞匏用特表之以告欲讀咸同閒之詩史者余舊詠始皇有句云功罪一家都是火益焚山澤政焚書兄荷生聞之曰政非益子孫也復作長篇解之



唐虞有五臣出身皆草莽上帝監其德迭以天下獎益爲皋陶子嬴姓大功兩姬籙旣漸衰秦受命如嚮用兵數百年戮力作君長六王已鯨吞乃忽設奇想欲盡愚黔首默默聽刑賞畢收前聖書一炬入羅網諸儒並阬之冤魄訴泉壤禹湯文周孔怒排惡氛上翩然來帝旁乞罪意鞅鞅謂彼無道秦流毒及吾黨帝顧益曰吁禍實自汝昉當時烈山澤火官汝所掌子孫竊餘燄敢作此魍魎益拜手對曰臣宗久被攘今茲虐者政遺體是奸駟春秋典臣祀非類臣不享帝黨降之罰請以龍族往赫赫赤帝子火雲起芒碭

雨後泛青溪

青溪雨過濕濛濛畫舫輕移似碧空芳草生時江水綠春山明處夕陽紅榜邊帘影低迎月樓上簫聲暗墮風最是亂鶯嘯歇

後卷簾人在柳花中

初遊樸園

十分春色在柴扉眞悔紅塵插脚非一片鳥聲供勸酒四邊花氣替熏衣略添醜石山逾秀纔著疏萍水便肥不是主人能好客夜深也待月明歸

月夜訪孫竹康

漸入空山近戴家四圍煙樹定昏鴉流雲有意欺明月芳草多情護落花茅店風知新酒熟柳塘水送去燈斜此間樓閣如天上何必桃源問釣槎

遊妙相庵

四邊山色一園新忘卻門前有熱塵春盡草香濃似酒日長花意倦於人短橋水上萍爭路小閣雲多竹買鄰不受提壺村鳥



勸爲留醒眼拜靈均

庵有屈子祠堂

孫竹厓之常州吳次山之揚州以同日行時慶子元滯秦興未歸

望斷海東人不至諸君明日更飄萍江南春盡落花急賸我零丁一酒星

送春日寄吳次山揚州

無沽酒處猶餘冷盡落花時更不愁聞說春歸到江北那禁惆悵望揚州

舟發石頭城夜作

涼雲斷處遠天青兩岸菰蒲萬斛螢飲慣石頭城下水如今著我作飄萍

西施詠

溪水溪花一樣春東施偏讓入宮人自家未必無顏色錯絕當年是效顰

嘲燕

海燕將雛分外忙呢喃終日向華堂生兒盡學江南語秋後如何返故鄉

春閨曲

也卷重簾也倚闌暗緘柳絮寄人看東風用盡開花力吹上儂衣只是寒

原盜一百六十七韻

先皇壬寅年外夷肆鬼嘯既奪潤州隘遂鼓金陵權先夷未至時南民畏其暴紛紛謀避城婦人尤遠蹈俄而官盟夷江上敵削約虛驚七旬餘夷去疾若鷁城中高舉者村居半改貌宵眠

近代詩鈔

金和

三



蝨無疇晝食羹不芼至是驅車歸戚里相迎勞捶胸論酸辛把  
酒不能醕風日蘊蓄深致疾每難療朝朝歌蒿里處處焚楮鈔  
由來十餘年談次神尙懊今茲粵氛惡詎不烽早耀大家鑒前  
車主靜信神告先賊未至時南中之問於神者簿卜鸞請婦口

雖曉曉男兒必執拗萬人無一二網兔脫身逃餘皆陷盜中將  
肉委虎豹往往婦語男以不見幾誚我雖與衆殊交謫略同調  
豈知中夷毒匪獨民不弔國事此荆莽禍固有由造夷乎註誤  
多聽我說原盜盜首生潯江實在交廣徼湘南諸煤戶寒等厥  
民隩蠢蠢初無知羣聚第叫噪縱或觸犴獄不過氣桀驚極其  
才所能相率事掠剽平生委泉壤夢不及官誥何至夜郎大乃  
欲竊名號當夷構釁日此盜各年少方於炎荒居近見夷犯澳  
只覺孫盧鋒大都炬火燭中原有全力海必澆熠燿旋聞閩越

靡江南順風到前後才三年萬里騰狂蹇帝自赫然怒諸將太  
不肖專闖獵海琛上上珠翠瑁自其贖貨外則一無所好嚴衛  
色常墨魂隨鼓鼙搖那知戰何事如女羞說醮彼夷視諸將餽  
問合屎尿據楯可罵之不肖詛楚禱若以忍辱論孺子竟可教  
代夷張虛聲給帝太阿倒待寇作上賓禮直修聘頰賂以金如  
山市假神州奧奏書單于悖奚止佗兀稟居然呼二天含笑魍  
面類歸舟吹競律喜氣徧壺嶠此盜斯生心本來昧忠孝遂謂  
狂蟆精果食太陽曜時於輟耕餘隴上野性趨指天而畫地側  
身忘載燾從此堡社間殺人向人訐椎埋漸公行罔忌刑禁蹇  
萌芽特猶微虺敢蛇遽效向使盟夷後諸將略計較病過從良  
醫戎事急學數因其人震悚選其俗悍剽月異歲不同使知武  
可樂壯健皆國有善養鷹與鷗邊隅固金湯春秋重邏哨懲羹



夫何嫌備豫古訓要此盜必不起起亦可立標何知封疆臣舊  
習是則倣祖宗定兵額歲折幾路漕久皆成具文談兵徒柄鑿  
手握龍虎符於心似無狡權陰屬偏裨千夫百夫燾一家妻若  
子首易姓名冒更用誚私恩姻特芘蘿蔦十已吞二三然後兵  
列竈兵復互容隱濫竽廁幼耄大率州郡兵實數大半靠借問  
兵何爲分飛馱與鷓中有至賢者恂恂士游校市井別肄業治  
生及屠釣劣者殊不然鄉閭恣蹂躪影兼吠聲勢憑城社窳  
彼所謂長官聞見久聾眊平日奴隸叱門戶供灑掃賤役靡不  
執次第直分僦貓俱狎鼠眠家人比嘻嗃抑有少忤意威欲杖  
以藿乞憐地暫搶逃罪柱還繞亦可祖父前子孫大謹噉反師  
顏子淵犯者置不校大吏以時點樹旗帳曰操逐隊仍兒戲壁  
上聚觀譟瘠馬雕錦鞍廢劍髻漆鞘冠必朱髻纓鞞必綠長勒

鎗或火不鳴矢或風而趨約略步武齊鼓絕銀字犒偶捲毫毛  
疵責之煩扑敲是爲司馬政兵糈一歲報其在兵婚喪且別賜  
芻稍令節亦優酺軍籍抵金窖浩浩天子恩車甲雨時膏藝威  
顧若此甚矣國財耗此盜以夷卜如獲上吉玻更知營壘情私  
慶舞其翻腥燄彌吹揚已將發之慄又况守若令棠愛尠頌邵  
萑苻藏巨姦明鏡都失照有民縛盜來駭甚雛在拖誦誦爲盜  
辯拍案老鼃叫畏事甘養癰屢放鱷出罟其民堂下譁唾面自  
拭炮民皆太息歸盜愈睨之傲拱手仰盜息若勝憂旱澇盜曰  
粟粟之不敢貴昂糶盜曰衣衣之不敢吝宿漂同聲怨官懦萬  
口籥應籥官聞乃大樂風雨忽姦瀑桎梏拘而來謂汝盜援奧  
否胡餉盜爲汝身象自燒駮駮盆蓋冤逢逢瓠鑽竅明明樓幻  
蜃隆隆鼎賄郤勿問淚眼枯魚肉猛咀噍坐此民怒深家駒化



作獬垂時盜潛扇教畜短髮耗黃巾與紅巾胥界大布帽鶻唬  
惑鳩媒一旦傾巢策東家抉其楹西家撤其榻南家負其鋤北  
家挈其銚此焉捐囊篋彼焉獻困窮決計踵盜門願與盜分俵  
請爲盜前驅轉似漆投膠由是盜驟熾狐語燈夜罩孽雷喧角  
鉦愁雲布旌旄卻從夷主名耶穌拜初廟逆視夷有加誣天妄  
稱詔試窮此盜根然否盟夷召至于兵興來諸將則尤妙本來  
勁旅稀市人雜嬉敷苟能漸摩厲擇繫汰其糙勇可作而致何  
懼不輕僥乃從肉受脈卽如麪飲醇纔聞壇上拜便睡山中覺  
只期幕烏集曠舞晨雞詔自盜弄潢池於今幾寒燠所過皆嚴  
關守可一夫燒步步讓畔耕省盜馬箠擊諸將隨後塵聊當遠  
臨眺畏盜膽易破未戰師已燒將是蟬語冰兵是蠃旋淖在我  
棗室憂久知原必燎獨至金陵失真非意所料謂有向將軍夙

名騎之驃帝望屬方新功詎他人媚固當計犄角預阻長江艤  
盜既來如飛赴援進必躁豈不念南民延頸積臍眇但使牽其  
外環城富有礮雖圍庶無虞城幸最險隋故抱不還議敝廬守  
宵窬吾母弼久病體弗任輿轎自宜安鳩安未用鬧蠶鬧安知  
吾智昏終詒家室悼誰云狃於夷佳麗地戀嫪昨者夷船來士  
女粟亂爆猥曰夷同仇將藉鯨逐鱖其實牟利行交反通紵縞  
鑄姦本同物往事早先導倘命回紇助多恐頭不掉非夷此盜  
無無爲盜所笑

周還之

葆淳

作無題詩二十四首假以書憤同人多和之

者余亦得四首

春陰黯黯閉門居禁火時光破膽餘敢爲明珠多護惜乍聞唬  
鳥亦生疏癡心尙想花無恙薄命應知水不如背後相逢剛一



笑大家雛髮上頭初

曉風鈴索暗心驚金屋深深住不成出海暝魚從急性對人羞  
草只吞聲願埋黃土都難事得傍紅燈是更生如玉阿侯拋擲  
苦胭脂山虎果無情

村婢如今舊誓違琵琶別抱不嫌非甘隨虜吠燒香去忍逐鵲  
唳響屨歸同伴難禁尖口角新妝頻逞瘦腰圍紅綃未是真承  
寵要著葵黃入道衣

朱樓落盡萬花枝洗面朝朝眼淚宜山欲望夫和土化鳥休思  
婦覓巢癡竟沈苦海終非計便出愁城已不支學得南朝無賴

法破家時節苦裁詩

用王次  
回句

### 五月七日母命出城述賦

老母傳示紙三寸欵側澹墨十數言謂聞爾日賊促戰千家萬

家人出門爾獨何爲戀虎口六世名族惟爾存生是婦人當死  
耳此時言義休言恩爾去將情告諸帥況爾有口兵能論背人  
讀罷火其紙纔欲痛哭聲先吞中夜起坐不能寐十指盡禿餘  
齧痕在家何曾得見母母教誠是兒智昏宿將南來過兩月胡  
至今日軍猶屯或者條侯太持重不識此賊原遊魂倘以裏言  
走相告未必幕府如帝閭藉手庶幾萬分一還我甘旨雞與豚  
甘作罪人背母去甘金饋賊吾其奔

時逃人必先輸賊中食者  
金其賊即衛以出城始免

詰賊

### 痛定篇十三日

兩日善橋飯三日龍溪眠一日脈要村五日鍾山巔栩栩隨風  
蝶跼跼墮瘴鳶昨日賃此屋乃在營東偏危樓十數椽一月錢  
二千庖湏借鄰廡几榻聊安便薄醉從飽睡笳鼓時喧闐中夜



復起舞敢謂聞雞賢竈熱還因人已起晨炊煙居然鳥巢林風  
雨可避焉如今痛定矣請歌痛定篇

正月二十七居人走相報謂有奔馬來江警今在告負郭千萬  
家入城附堂奧如牛得火驚似蟹在糖躁明夜城外喧次第賊  
果到九城先已閉守陴各安竈我亦登城看始見賊花帽是時  
賊尙稀城下肆舞蹈轟然鳥機發卻作厲鬼倒晦日朔日閒環  
城樹大纛紅衣而黃裳遂集如毛盜城中眇勁旅況賊攻之暴  
乃招市兒兵徒手助鼓譟從此盼外援北望費祈禱天皆低欲  
頹十日雲不掃惟餘礮火明萬鳥避而噪夜夜城中民煮粥上  
城犒

二月初九夜礮急不容瞬遲明繞城呼賊自北城進北城地臨  
江隧道賊暗濬城根失憑依一角礮自震砉然若阨隕險步賊

乃趁是時守城者尙欲釁其釁囊米積如薪畚土實諸櫬所崩  
恃補苴功頗奏之迅入城賊數百大半亦飲刃誰知他城兵得  
賊入城信一唱百和逃奪命自蹂躪西曰清涼門蕪蔓略不潤  
近南有矮城其差將及仞萬賊攻方環忽見解嚴陣遂以雲梯  
登諸山斗合燼督師來自東巷戰以身殉其餘數十官先後死  
其印狼虎從魚休街市漸充物刀鎗極天鳴走避駭覷吾鄰  
屋太華必受賊問訊奉母急移居蓬茅各牽引閉戶不敢眠夜  
聽鼓角振

夜聽鼓角振借問在何所八旗駐防兵只今稱勁旅防者防此  
邦本藉固江圉地重兵恐單所貴侮同禦滿漢久一家在國皆  
心膂帝惟無分民守土故用汝聖澤二百年斯民和飲醕何期  
邠岐人終欲外齊楚當賊初來時意已略齟齬四城籌守陴僅



以什五與謂此外城事自居謀越俎及聞北城摧第一氣消沮  
西南棄城走孰先曳戈杵猥云保內城內城大幾許如樹之有  
巢如水之有渚水潰樹既顛巢渚豈可處縱令獨瓦全孤寄等  
雀鼠碎璧執其組於國詎有補况萬無此理譬蟹早失駟徒令  
賊致力面面合鋒炬戶萬口五萬裹創及婦女豈不奮臂呼各  
以死戰拒一隅果難支賊如毛羽舉試聽今夜聲痛哭徧郊墅  
何不昨者晨仍結外城侶固知寇已深南人劫方巨要之秦越  
視吾終疑其語

賊既全入城我門更深閉不知門中人今所處何世遑問他人  
家朝夕底作計中夜猛有聲火光極天際俄頃數十處處借  
風勢屋瓦一時紅四方赤燦帝心揣賊所爲殘命萬難貫母呼  
坐近牀兒女各牽袂阿嫂將一繩繫婢還自繫謂死亦同歸神

定都不涕門外賊鳴鉦梟語音方厲驅人往救火不許道旁憩  
相顧愈狐疑將無賊夢嚙忽聞叩門來乃是西鄰壻一一爲我  
言始知火根柢日來賊科財按戶如責稅賊黨復私掠先據最  
高第囊篋罄所有褫及婦衣敝錢盡更捉人隨意犬羊曳苟有  
稍忤者一刀以爲例故爾素封家或則縉紳裔與其遭慘辱束  
手以貨斃不如早焚身自甘灰盡瘞其餘鳩縊溺往往毅魄逝  
裹尸匙柳棺葬者血盈背汝居幸獨陋賊過不屑睨

初十至十九略定殺人性打門喧相傳賊亦有賊令令人占口  
籍書年與名姓老弱可從略意在壯者勁大半署爲兵加僞號  
曰聖其舊操何業及時許更正苟所甚需者則亦隊伍併惟男  
與婦分不得室家慶賊婦實掌之違者致禍橫我姑避其鋒獸  
肯自投奔江東大如海差異叢爾鄭往從數親知南北脚力競



黃昏不敢歸直待月懸鏡平明又出門東食西眠竟有時驟遇  
賊所賴日適病單福與張祿隨意我爲政亦嘗受賊拘尺寸手  
無柄賂之復得免始信錢勝命置身如此危幸不爲賊誦  
二月二十三傳聞大兵至賊魁似皇皇日或警三四南民私相  
慶始有再生意桓桓向將軍仰若天神貴一聞賊吹角卽候將  
軍騎香欲將軍迎酒欲將軍饋食念將軍食睡說將軍睡老母  
命近前推枕手彈淚謂有將軍來死亦甘下地縱遭玉石焚猶  
勝虎狼寄七歲兒何知門外偶嬉戲公然對路人說出將軍字  
阿姊面死灰撻之大怒詈從此望將軍十日九憔悴更有健者  
徒夜半誓忠義願遙應將軍畫策萬全利分隸賊麾下使賊不  
猜忌尋常行坐處短刃縛在臂但期兵入城各各猝舉燧得見  
將軍面命卽將軍賜誰料將軍忙未及理此事

金陵百萬戶平居如儉荒豈知崑崙山中有萬寶藏賊能竭澤  
漁毒網彌天張朝令徙一巷暮令遷一坊次第驅其人以隊叱  
犬羊其人旣已驅返身上其堂井竈庖廁楣檻屏柱牆一一  
搯之爛惟恐屋不傷盆盞鼎豆壺几匱廚櫪牀一一撞之碎惟  
恐物不戕然後謀飽橐首選白與黃有錢或萬貫有珠或一囊  
有薪或千車有米或百倉珊瑚翡翠玉海中之奇香灼灼日不  
識棄在塵土旁羅綺錦繡段紅閨舞衣裳鐵體衣十重山鬼跳  
太陽闐然鳥獸散頃刻荆棘場吾固謂此賊不稱星天狼實破  
敗五鬼天使來披猖居人夜潛歸無聲淚浪浪

我家何所有家具慙中人從賊泥沙之豈值錢千緡獨有書八  
廚自謂家不貧我父客四方前後五十春歸必載數篋用壯車  
前塵我兄嗜彌篤廿載朱門賓少小不好弄惟書道津津生平



所肆力目錄學者醇故能擇英華片紙賞必真我承父兄教差  
亦解苦辛洛市十餘年所聚略等身兩世三人勞羅致傳家珍  
讀之方未盡每愧紅蟬鱗以視百城擁誠如附庸臣井蛙而遼  
豕未足跨龜麟要資儉腹糧聊當粟一困況有希世物呵護宜  
鬼神此皆筆耕得善價分米薪非果有不廉詎令天生曠胡亦  
爲賊據屋悔西南鄰聞我尊閣地萬雞今司晨可想油素積賊  
見怒且顰大半供爨燭劫火同暴秦否亦污穢旁布囊紛前陳  
天乎無乃惡我淚常霑巾惻惻念吾寶寶甚金與銀慘哉芸根  
香終古不復新

賊婦作何狀略似賊裝束當腰橫長刀窄袖短衣服騎馬能怒  
馳黃巾赤其足自從入城後忽效吳楚俗夜叉逞華妝但解色  
紅綠彼或狐而貂此或紗而縠鬼蝶隨風翻豈問春寒燠頭上

何所有亦戴花與木臂上何所有亦纏金與玉錦綺不蔽踝但  
繫裙六幅更結男子襪青鞵走相屬鳩舌紛笑譁麀集踞高屋

朝去朝賊王官以女頭目既定兄弟籍乃盡姊妹族賊曰兄弟呼

以女皆老幼異姊妹不大索從閨房一見氣敢觸慘慘眉尖蛾撞撞心

頭鹿小膽皆鼠銷修頸半蠶縮吞聲出門行敢云路非熟十里  
更五里尙謂行不速喃喃怒罵多稍重且鞭扑襍被未及攜知  
在何處宿求死無死所求生則此辱苦恨小兒女徒亂人意哭  
棄置大道旁不復計慘毒長者乞食呼幼者蠅螞蔟我急還家  
看幸未被驅逐

三月二十八有賊叩門急我先出門外去賊十步立其旁一人  
者善氣似可挹稍稍前問訊家乃楚夏邑城中販麥來被賊苦  
拘執千里驅相隨斂鶴雙翼戢謂我啓厥戶毋貪螫蟲螫邇日



括婦口一一豚入豈今已至此方豈免駒盡繫有婦性和柔賊  
界爵一級此方所經營意在澤雁輯汝宜速作計戚里廣招集  
故廬仍可居庶幾便樵汲況汝有病人衾榻亦所習當斷若不  
斷黯黯閉門泣坐待賊搜掠臍噬悔無及彼賊皆蝮虺枯菀在  
呼吸我聞感其言不覺欲長揖往告鄰家婦附處約三十當關  
施闌幕藩籬略修葺妻兒踣問語聲尙通嗚咽老母室內眠我  
遂不得入我有然諾友業織錦重襲其家賊所留逋客陌而什  
且往從之謀盟似責車笠脫身寄朱家觴豆都仰給朝去市餼  
粉貴抵羊乳汁雞子與菰苳聊當紫葢拾踵門遙遺母餐飯冀  
加粒歸眠複壁中夢醒被池溼

將軍遲不發賊愈得意鳴一軍將北旗一軍將西旌居然據蝸  
角豕突思長征前所得健士逃歸半空營城中更選人萬千立

取盈凡在工商賈按冊尋其名初猶作狡獪各以羸老更賊見  
皆唾棄唾棄爲不精擾擾十數日賊亦知此情乃爲揜羣計中  
夜雷交轟簿錄臥榻側牽去如春醒或則假他役賺之出嚴城  
授棘江上岸載以空舟輕甚且要諸路隨處施長纓纍纍猿千  
頭歸紡庭前楹監守網愈密語卽蛙日瞪有亡則荒閱同室巢  
俱傾偏伍旣略備命爲前驅兵其後楚北虜其後楚南鯨最後  
數粵賊高騎司鼓鉦日必窮足力次第相告偵苟有反顧者速  
殺尸前橫飲泣操戈矛安知幾許程猶幸所至潰賊自馳先聲  
偶遇王師怒萬死無一生捷書則曰賊某日先登爭臣等獲大  
勝此戰敵克勅可憐蒼與赤遂作鯢而鯨九泉哭呼天豈復達  
聖明我雖棲喬柯一日常數驚身無蟬翳葉終恐受醢烹老母  
聞其故手書斯勸行



我行既已成如雞噓出甕區區殺賊心尙未解醉夢自謂賊中  
來賊情億頗中懷刺干軍門聊以所見貢要之爲鄉里泣血大  
邦控我言賊可攻不信試詢衆雖在五尺童亦知非鑿空何期  
賊命長我力難斷送徒以全家陷此計仍拙弄長歌痛定篇能  
定阿誰痛

初五日紀事

前日之戰未見賊將軍欲赦赦不得或語將軍難盡誅姑使再  
戰當何如昨日黃昏忽傳令謂不汝誅貸汝命今夜攻下東北  
城城不可下無從生三軍拜謝呼刀去又到前回酣睡處空中  
烏烏狂風來沈沈雲陰轟轟雷將謂士曰雨且至士謂將曰此  
可避回鞭十里夜復晴急見將軍天未明將軍已知夜色晦此  
非汝罪汝其退我聞在楚因天寒龜手而戰難乎難近來烈日

惡作夏故兵之出必以夜此後又非進兵時月明如晝賊易知  
乃於片刻星雲變可以一戰亦不戰吁嗟乎將軍作計必萬全  
非不滅賊皆由天安得青天不寒亦不暑日月不出不風雨

得祁兒死信一百三十八韻

當我行計成汝病三日矣汝母送我行詰汝病何似汝母謂汝  
愈癡靜亦遺矢惟聞爺將逃意似愁不喜母令前牽衣涕泣難  
熟視其時事太急欲夜闖賊壘不復與汝見脫網三十里明日  
書報家尙問汝知否戒汝病甫差勿食桃杏李汝母寄我言汝  
第貪粥醢五月二十六紅日西滅軌我方寓樓眠如夢背驚泚  
明明汝投懷電掣光倏弭默以心注心頃必汝魂駛兼旬憶汝  
勞望信斷鴻鯉六月既望夕我舟秣陵艤舊僕城中來特奉汝  
母使初道汝尙病音哽雜商徵怒使畢其說不覺清淚瀾始知



一月前汝母設詞詭念我干軍門恐亂人意耳我行辭家時汝  
實困牀第其後體益沈弱肉消至髀終夜長聲嘶鞵絢躁自禡  
脣焦飲索冰茗盃碎諸齒大抵汝驕陽墮地肺熱痞昔惟犀與  
麝性命得所恃賊中買藥難致汝藏府毀前日來尋爺乃果汝  
魂是是時汝迷瞽良久氣復弛明日雞三號汝遂蟬蛻委不從  
生父生竟從死父死日初明時已危甚忽張目謂其乳婢曰今日非爺生日乎婢曰然不復語其日入時遂昏去數刻蓋即入余夢時也既漸  
蘇至次日天初明時為之則尤可悲矣死同日若果有意為之則尤可悲矣 汝生今七年材地雖不  
美已識數千字可免亥誤豕爾雅蟲魚名偏旁敢縣揣毛詩四  
萬言琅琅略上觜諸家蒙求書熟記古名氏索解稍易處麤亦  
達大旨性尤喜塗鴉禿翰濁墨滓虛室暫無人破壁走蛇豸袖  
中糖粉錢都售毛竹紙我嘗惡汝貪教汝學種柿自汝伯父在

欲待余再有子在先則棄世之後伯父久矣故不改稱蓋 細意校文史

殷勤鑿楹藏顧汝立階屺往往笑語汝為汝儲耒耜他日遺汝  
田在汝好耘耔於汝無多求但願作通士汝意殊欣欣自命語  
甚侈期盡手口之然後從宦仕居然中結習油素好積彙凡我  
所經營草彙尺有咫下至焚棄餘點黠半瘡瘡皆汝縹囊物排  
次納之匱有如希世珍尊閣私在己他人苟誤觸汝必瞋且訾  
昨者賊之至倉皇盡室徙盆甌各負戴廚榻互角倚汝猶抱束  
筍當戶喘而俟繼聞屋豢雞書棄若敝屣一賊憎其多朝趁積  
薪燬汝獨大詛罵恨不刃狂兇與書殆夙緣厲父差可擬滿意  
汝長成雕蟲世其技汝面方如圭汝目澄若水汝髮纔總角早  
自矜帶履準爺作裝束翻不慕紈綺每言是男兒詎與嬌女比  
戚黨羣童中庶幾鶴雛時汝食雖非藿數必爭兩盞食徹誇留



餘分餉諸媪婢小妹奪而去亦不難色鄙向夕我飲酒汝志在  
染指姑未乞殘瀝敬立執壺釀須臾竊舉醕眉宇潑脂紫偷閒  
偶戲劇囂噉厭街市最好爲館師端坐據高几不知譙訶誰聲  
聲責人跪有客來叩門汝卽先曳趾肅拜通寒暄遠勝僮輩俚  
或再試之無深談掌竟抵常博高軒譁謝我喬遜梓汝性微戇  
劣汝母屢笞箠我惟挫汝鋒命杖輒中止汝卻畏爺甚頗解折  
蓼恥縱極別嬲人我呼則唯唯凡汝平日事了了不勝紀敢曰  
癖譽兒猥效王福時原非阿龍超阿龍小名大要老牛錫何圖玉  
之樹香色結空蕊豈免猿唬枯茹痛徹筋髓更念汝大母痛尙  
當倍蕙頻年大母病長臥不能起百無一歡腸獨愛汝步跬知  
汝習禮貌不惜錦帘被稱汝腰身裁改製服提提謂汝多老成  
決是好蘭芷但非蓬近麻猶恐橘化枳聞汝鄰塾歸當飯必停

俟召汝叩所學詞句覓瑕玼日課責旣畢賜汝最肥肺慮汝睡  
之蚤燒燭還繼晷授汝唐賢詩記韻棗栗以汝讀請大篇顏霽  
笑口哆夫豈督汝嚴欲汝璞恒砥且藉遣老懷課孫樂故爾我  
之爲逃人汝代職滫瀡有汝在眼前門閭可無倚一旦天奪汝  
招魂室伊邇能勿肝脾摧空拳枕衾捶哭久喉舌啞洩唾滿槃  
匱至撫汝病者汝母娣若姒遙知汝病篤食已減糠粃頃來火  
應斷塵冷土竈錡向人作喑鳴面垢髮弗纏癡絕焚紙錢賣盡  
舊簪珥汝今掉頭去野路陰風裏幸有汝伯父挈汝竄荆杞相  
依九幽居鬼屋何處址晨夕儻嬉遊想訪汝禕姊饑寒當汝調  
汝更幼於彼可知憶生人黃壤陟岵岵可知生人悲黑海失涯  
淡況我近中歲汝外尙無子六世二百載金氏孰尸祀宛余家自  
江寧已二百年及余爲第顧影此孤注神悸魄潛靡只恐羸者



身我病復此始聞汝奄逝後桐棺賊禁庀貯汝故衣櫝四周實  
絮桌昏夜急埋汝偷掘菜畦坻淺土封汝穴仍僞種蒿芑暫免  
狐犬搜雨甚斯立圮我瞻金陵城鐵鑄萬千雉將軍收城事未  
易時日跂他年尋汝墳汝定飽螻螳嗟哉我今生無見汝骨理  
哭汝不成聲濡筆盡於此字皆汝所識聊當祭汝誄知汝聞不  
聞寫吾哀而已

雙拜岡紀戰

我過雙拜岡紅日漸西入一隊蜀郡軍赴戰意甚急道旁皆狐  
疑相隨頓雲集前行未百步楚士兵各執狙何何人家環屋四  
邊立尙欲踰垣看攀樹當梯級蜀軍自東來呵逐楚士開楚士  
轉身鬪戰聲馳如雷大刀狂有風長稍疾於雨雙拳鷹鶻兜獨  
脚象鼻吐貼地捷進猱衝天善飛虎身挾車輪盤氣振屋瓦舞

纔驚彼洞肩卻是此斷股額批創更裹胸貫薦猶苦直似父母  
讎豈但酒肉怒從來攻城時未見今日武雖各數十人半里暗  
塵土觀者魂盡褫前指敢笑阻兩軍戰方酣一人怒馳馬竟從  
此門出瞬已到山下楚士紛逐之譟語餓鴟啞馬上必蜀人楚  
士所捉者蜀軍志擁護鴉散亦走野吾儕好選事略息行人喧  
稍稍相問訊來窺此家門門中一幼婦頰顏自呼冤我亦不必  
問汝亦不必言

兵問

兵來前吾問汝汝今從軍幾年所且不責汝無事年年用國  
如山錢亦不責汝近年事弓刀盡兒戲只汝出門時汝家  
復有誰若父若母若汝妻若兄若弟若汝兒骨肉哭路歧不能  
親相隨旁觀代銜悲祝汝歸無遲自從送汝後竟無見汝期古



人亦有言生死半信疑何知汝身在身在心死久煙牀鳩毒甘  
博局梟采負帳下畜村童路上詵村婦村民米與衣結隊惡聲  
取縱免將軍誅可告汝家否汝家儻聞知念汝罪難赦老者愁  
可死少者悔可嫁壯者欲汝囚幼者亦汝罵汝或猶有心不淚  
當汗下計汝惟一戰功罪在反掌豈但慰汝家報國受上賞君  
不見中興第一韓良臣本是軍門舞槩人

### 雙將行

如我語語謝將軍將軍何以威名聞賊不敢割鍾山雲鍾山在  
東營最後西前一營倚山右逼賊一里與賊守其將白面二十  
餘一槩殺賊賊不如賊以千刀來一槩已入刀中呼賊以萬火  
來一槩已出火前趨賊懼賊且退一槩闌賊當溝渠賊敗賊乞  
命一槩驅賊如羊豬東城之賊夜不眠由來軍中有一全參將名玉

貴更結一營鍾山南但願賊至戰便酣其將短身近三十兩刀  
飛舞對賊立開門延賊賊不入出門挑賊賊不集捉刀稍前賊  
走急賊走未步刀已及刀旁衆賊環而泣但聞刀聲風習習不  
知所殺若干級衣上半邊人血濕南城之賊塵不揚由來軍中  
有一張都司名軍聲仗此二人在鍾山尙在桃源外將軍無言  
坐帳內

全君者黔人起卒伍在楚南有禽僞王子功甲寅春已官總  
兵奉命佐和春督師攻廬州君至則當賊而營戰甚力其六  
月臂骨傷於礮經數醫鐵丸不得出憤極創潰卒張君者字  
殿臣粵人自賊中來歸今已積功至提督幫辦軍務方全君  
之去江寧向榮督師指臂惟君一人而已三年以來賊狼衝  
豕突致君奔命不遑雖積有威聲所向披靡然循江上下南



北人皆待命於君則君亦勞矣今年五月鍾山之潰君適逐賊溧陽或云在六合聞而馳歸衛督師東下止於丹陽督師旋以憂死時賊勢方盛分數道並進君以死力走之嘗於一日夜來往三百里內各與賊戰戰比勝他軍亦數萬君所不至無敢戰者苟非君一人撐柱砥隕則常州以下東南郡邑事未可知焉他日吳中尸祝之報竊以爲不在向督師而在君也

丙辰八月補識

### 江寧死事詩十四首

機匠父子 機匠某者居西南城隅下浮橋右委巷中與三子皆絕有力賊初入城比戶括財物苟屋非甚華啓則入閉則去於是居人皆閉戶匠戶獨啓坐候賊其室僅三間各以一子主之置刀杖隈處賊衆至者則僵

僕肅送迎賊見其無長物輒棄去賊若三二人或一人至則必止賊過其家賊才入卽鍵戶而守諸子視賊所至室執而殺之於後圃埋荆棘中旣埋賊復啟戶如是者十數日所殺賊將百其繼也鄰有老婦人忽戒一賊毋過其家事遂露羣賊夜來圍之與二子皆鬪死惟中子得脫此余癸丑五月聞之於橫山村民蓋亦爲機匠城中去所居非遠嘗親見其殺賊者說時略述其姓名今余忘之矣

健兒終并命彼婦竟何心魂魄或無恨生存已到今大家都敢死何賊不成禽十日磨刀慶中庭殺氣沈

武昌女子 武昌女子者在賊中姓名爲朱九妹然眞僞未可知其全家爲賊所驅自湖北移江寧癸丑之冬



僞東王欲納之僞東王固賊魁也女欣然入賊王宮宴  
驩甚女潛寘毒藥於酒若食中進賊王持之急爲賊所  
察立磔死於是賊選色之令遂弛焉

此亦霹靂手何妨見色身不聞教坊曲猶唱費宮人事豈論成  
敗天宜鑒笑顰餘威賊膽碎兒女受恩真

張了頭 張了頭者里巷習拳勇之民世所稱爲無賴  
子也城陷後浮沈賊中近一年能終不爲賊所得蓋其  
智有過人者甲寅二月張君炳垣旣與外兵成謀計非  
有勇士不能斬關迎外兵或舉張於張君張君使人說  
之張不可曰張君知我必自請我乃爲知我者死耳張  
君聞之卽日過張張大喜許之至期張袖大刀夜至神  
策門盡殺守門賊二三十人候外兵外兵迄不至張遂

惘惘歸旣而賊推殺人者甚急適張君事已露有知張  
附張君者白諸賊賊乃捕得張張呼賊速殺遂先張君  
死先是有倪了頭者亦以無賴稱於賊陷城日凡賊獨  
行委巷中倪伺左右無人卽袖出刀殺之凡殺七八賊  
賊終不得主名後不知所往與張爲二人邪抑卽張而  
傳者倪其姓邪故附表之

纔知刀有用熱血滿身歸殺賊心原在收城計已非三軍常健  
忘一載只長圍值得酬知己江東賤布衣

諸生張君

繼賢

君字炳垣上元人自圍城時君與當

事謀所以守禦者甚備事不必盡得行行亦不必及於  
事城卽陷君卽日變姓名屬僞北王僞北王亦賊魁也  
所私屬凡數千人君察其解事者時時說以大義並陳



利害誅之則皆色然動君知其可用乃與鄉人謀之各以其親知從一時之潛結者半於城於是楚北人爲賊脅者聞君事皆爭先附君雖楚南粵西人亦往往而至君部署略定癸丑八月遂以五千人名上諸向督師願應外兵督師喜所以嘉許者逾常格旣與之約皆失期爲督師謀者欲自飾其緩也且多方誤君城中人皆咎君語不誠稍稍散而君時時往來督師營受賊譏察亦數瀕於敗蓋至甲寅正月而君力已憊然君之衆猶千有餘人乃約二月五日殺神策門守賊納外兵外兵未赴以兩辭張了頭死焉而君之事先露矣賊收君窮君黨刑毒非人理君與賊遊久凡賊之勦勅能爲賊出死力者君皆知之君輒受一刑畢則曰吾黨夥汝以册來

吾徵汝則出册以筆志其名賊卽駢戮之十日中凡死四百餘人皆昔之勦勅能爲賊出死力者也於是賊之驍大損賊亦悟惟苦君令言楚北及江寧人君遂無語餓已死賊輟君尸故凡與君同謀者皆得逸出於是無應外兵者矣嗚呼君之死也最後而君之死也亦獨慘余特以君殿焉癸丑十一月余聞君與營中往來自全椒急馳書緩之蓋余留營中幾一月有以慮其事之必不成矣惜乎君意方銳也

萬戶侯相待原拌七尺軀鬼都瞋賊酷我敢哭君愚黑海橫流是青天醒日無連營消遣過苦費大聲呼

七夕五首

二

寄語雙星慰合歡更休清淚夜深彈江南夫婦重離亂儘有今



生一會難

鵝鵲橋非引鳳樓聘錢未了各歸休黃姑落得無家累不似梁  
鴻廡下羞

欲起

欲起仍眠戀宿醒禁煙時節易天明還家亂夢鐘催斷隔夜殘  
詩雨補成桃李此鄉應笑客江湖何日且休兵餘生又伴青春  
老願聽鶻唳不聽鶯

秋暮聞蟬

滿地秋心獨自悲一蟬遙在最高枝此君差勝歸飛燕尙與愁  
人話片時

鄭千總死事詩

鄭君鴻謨金陵人官千夫長勇冠倫老父都護鬚如銀時清無

事家陽春一朝楚澤紛煙塵督師奉命誅黃巾吳中十郡調發

頻父名在調君則鬢衰年何以勝戈種兒壯能舉鼎百鈞督師

曰善汝代親壬子冬仲旗鼓新丈夫許國寧酸辛明年遇賊西

江濱地名賊騎壓地魚貫鱗我軍欲戰萬手敝南風無氣白

日溼惟君虎視雙目瞋有刀不鈍馬不馴殺賊無算如刈薪犬

狼四面環而狺自辰陷陣今日申君裹創起方遶巡賊已交刃

君之身咸豐癸丑月在寅初九日晡君成仁丹心感愧邀恩綸

魂歸猶戀蘭陔循是真孝子真忠臣

斷指生歌

生何來斷其指指則斷氣如矢老拳貫竹臂能使一日猶書一  
千紙生滁州人獨行儒聖草善作黃門書當世貴重等萍綠換  
羊求判何時無十年鼙鼓江上頭都督者誰踞此州諸將豈但

近代詩鈔

金和

二十一



絳灌恥出身大抵巢芝流生於爾日困鄉井如抱荆棘爲牢囚  
一騎飛來花底宅非分誅求到煙墨倪迂之畫戴逵琴誓不媚  
人請謝客彼哉聞之勃然怒大索捉生官裏去門外駟駟牛馬  
走堂上吽吽虎狼吼金在前刀在後書者得吾金不書戮女手  
生上堂叱叱且詈盜泉之酒我寧醉女今殺我意中事語未及  
罷指墮地左右百輩戰色酖生出門笑笑且呵筆鋒不畏刀鋒  
多刀乎刀乎奈筆何乃知世有鐵男子一字從來泰山比古今  
惡札常紛紛痛惜生平指頭耳死灰既死不復吹生雖斷指書  
益奇墨花帶血光陸離從生乞取半丈幅張之草堂白日驚夔  
魍

蘭陵女兒行

將軍既解宣州圍饒歌一路行如飛行行東至瀨水上乃營金

屋安玉扉步障十重列紈綺流蘇百結垂珠璣天吳紫鳳貼地  
滿珊瑚玉樹燈相輝靈蠟之柁大蠡棧椒花釀熟羊羔肥坐中  
貂錦半時貴眼下繁華當世稀道是將軍畢婚禮姬姜舊聘今  
于歸蘭陵道遠蹇修往春水吳船憑指揮良辰風日最明媚雪  
消沙暖晴波翠雙橋兒女競歡聲新年梅柳酣春意卓午遙聞  
鼓吹喧前津已報夫人至將軍含笑下階行衆客無聲環堵侍  
綵船剛艤將軍門船中之女隼入而猱奔結束雅素謝雕飾神  
光綽約天人尊若非瑤池陪輦之貴主定是璇宮宵織之帝孫  
顧身屹以立玉貌慘不溫斂袖向衆客來此堂者皆高軒我亦  
非化外從頭聽我分明言我是蘭陵宦家女世亂人情多險阻  
一母而兩兄村舍聊僻處前者冰畦自灌蔬將軍過之屢延佇  
提甕還家急閉門曾無一字相爾汝昨來兩材官金幣溢筐筥



謂有赤繩繫我母昔口許茲用打漿迎期近慎勿拒我兄稍誰  
何大聲震柱礎露刃數十輩狼虎紛伴侶一呼遽全集戶外駭  
行旅其勢殊訂訂奮飛難遠舉我如不偕來盡室驚魂無死所  
我今已偕來要問將軍此何語女言縷縷中腸焚突前一手搥  
將軍一手有劍欲出且未出我言是真是假汝耳聞不聞我惟  
捉汝姑蘇去中丞臺下陳訴所云云請爲庶人上達堯舜君古  
來多少名將鐘鼎留奇芬一切封侯食邑賜錢賜絹種種國恩  
外是否聽其劫掠良閨弱息爲策勳詔書咫尺下五雲萬一我  
嫁汝汝意豈不欣不有天子命斷斷不能解此紛汝如怒我則  
殺我譬諸么麼細瑣撲落糞土一蚤蟲不則我我我劍奪汝命  
五步之內頸血立濺青絕裙門外長隄無數野棠樹樹下餘地  
明日與築好色將軍墳一生一死速作計奚用俯首不語局促

同斯文將軍平日叱咤雷車殷兩臂發石無慮千百斤此時面  
目灰死紋頰如中酒顏熏熏帳下健兒騰惡氛握拳透爪齒齧  
齧將軍在人手倉猝不得分投鼠斯忌器無計施戈獲將軍左  
右搖手揮其羣日視衆客似乞片語通殷勤衆客驚甫定前揖  
女公子聆女公子言怒髮各上指要之將軍心始願不到此求  
婚固有之篡取敢非理鹵莽不解事罪在使人耳若兩材官者  
矯命必重筮如今無他言仍送還鄉里將軍親造門肉袒謝萬  
死敬奉不腆儀堂上佐甘旨事過如煙雲太空本無滓請卽回  
舟行食言如白水女視衆客笑且顰諸君視我黃口佞彼今大  
失望野性詎肯馴山魃尋仇讐蓄念愈不仁慨從軍興來處處  
兵殺民殺民當殺賊流毒滋垓垠蘭陵官道上若輩來往頻不  
在霜之夕則在雨之晨我家數間屋獵獵原上薪我家數口命



慘慘釜內鱗彈指起風波轉眼成灰塵與其種後禍終作銜哀  
燐閻羅知有無夜臺冤誰伸何如踞九重天必無私綸或竟辣  
手作公論自有真明知我此來螳斧當巨輪甯猶計瓦全惜此  
區區身諸君調停詞蔓甚我弗遵衆客更前揖請勿變色曠將  
軍負賢名毛羽夙所珍壹意希儒風裘帶殊恂恂此舉大不踳  
一旦傳聞新萬口鳴不平可知言申申惡聲來有由欲辨難鼓  
脣白璧自污之罔值錢一緡悔過方不遑恨無障面巾江東諸  
父老相見慙相親況敢犯衆怒興戎自婚姻得罪名教盡不復  
能爲人斯人非尋常四方戰賊多苦辛大才雖非管樂匹英風  
猶是奢頗倫女公子既世家裔幸爲朝廷寬假熊羆臣他日之  
事願以百口保某也官府某也鄉縉紳翕然長跪代請命惟女  
公子爲仙爲佛爲天神女知衆客意難拂乃曰我爲諸君屈諸

君前說姑置之我與諸君借一物我聞彼有善馬名白魚日行  
千里猶徐徐我之發蘭陵辭家計已四日餘老母痛哭常倚閭  
兩兄中庭握手空唏噓若乘此馬歸到家可及今日日落初自  
今我亦棄敝廬卜鄰別有秦人墟桃花林中奉板輿從兄去讀  
黃石書武陵隔絕癡兒漁三日五日間我既遷所居秣陵蔣尉  
祠歸馬其何如將軍此馬不數馭至此惟恐女不去急呼從者  
牽馬前四足霏霜耳披絮女一顧此馬眉宇色差豫撒手始釋  
將軍衣身未及騰鞍已據一聲長謝破空行電掣星流不知處  
女行數日軍無騷將軍振旅膽氣豪鍾山之旁營周遭賓僚迎  
拜將軍勞斗酒勸醕新蒲萄鉦笳雜奏聲謹叟雲中匹馬塵甚  
囂清光無恙來滔滔千金一諾券果操將軍迎繫歸其曹馬汗  
如血長嘶號背上有物臃腫拳曲縱橫束縛三尺高乃是材官



當日將去之聘禮封還不失分釐毫聘禮脫盡處薤葉多一刀  
刀光搖搖其鋒能吹毛將軍坐此幾日夜睡睡不牢

### 烈女行紀黃婉梨事

君不見黃婉梨生不甘爲讎人妻虎狼累月相提攜一夕殺之  
如殺犬與雞貞魂烈魄雖下地浩氣上與青天齊一解婉梨金陵  
人儒風舊家是癸丑陷賊中女生五齡耳有母有弟有兄嫂全  
家種菜隱鄉里阿母教鍼綫阿兄授書史門外污者塵門內清  
如水二解朝朝盼官兵十有二年久官兵既收城全家開笑口叩  
門來一兵狀貌比賊醜搜屋無一錢怒掣刀在手女前跪致詞  
請以身代母兵曰不殺汝殺汝全家人汝能飛去否三解全家被  
殺時女木立若癡兵徐縛女出鞭馬還怒馳江干棧有船驅女  
使上之告以歸湘南妻汝汝勿疑四解女心默自計我死甯有他

我固不惜死全家讎則那忍淚向讎語我方身有病隨汝到汝

家嫁汝締葛蘿今有同船人男婦數十多汝若苦逼我我惟沈

江波不見金家婦汝奈江波何時有金眉姑亦金陵讎竟帖耳

聽不敢相詆訶朝夕敬事女水程累月過五解水程累月盡舍舟

當就陸同舟人各行同行一讎獨女心搖搖撞小鹿此去不知

何處宿何日誅讎死瞑目六解行未數里橫來一人伴讎而走甚

狎且親數數日女道女美彼此虐謔紛笑瞋女聞無言眉暗顰

兩惡男子意不馴我一弱女甯其倫事急惟有死保我金玉身

報讎在今夕萬一沈冤伸不報亦今夕銜悲極千春逆旅急偷

閒留詩壁間塵後有讀之者爲我聊酸辛七解倚裝幾何時白日

暗平楚兩倉羅酒肴燒燭照窗戶呼女陪壺觴教女伴歌舞馱

音恣號呶時雜鶯燕語逆旅夫何知夜寐各賓主八解明日之日



日正中房門不啟人無蹤破扇睨視生悲風一男中鳩死口鼻  
皆青紅一男毒較輕白刃洞在胸一女挂羅巾徧身窮絀窮細  
讀壁間詩了了陳始終乃知女所爲辣手真從容萬口嘖嘖稱  
女雄此女毋乃人中龍九解噫吁嘻女事雖幸成女心尤慘悽色  
身餌人餓虎蹊一日未死憂噬臍欲死不死呼天嗚至誠所動  
天聽低乃以杯酒爲媒梯仇讎刃畢月未西青溪之水魂歸兮  
世無血性諸紅閨綺羅金翠真土泥君不見黃婉梨十解

近代詩鈔

周長庚

長庚字辛仲福建侯官人同治壬戌舉人臺灣彰化縣  
學教諭

弔淮陰侯

天畫封建止嬴政侯乃逆天覬王柄假王片疏滎陽津乃公一  
罵王轉真一罵之封且勿喜真王亦死假亦死桀犬相背寧良  
圖野雞辣手勝乃夫舍人紛紛上變告彭轅覆轍皆相符吁嗟  
乎南昌下鄉恨蓐食收局藏弓入鍾室始終皆困亭長妻生死  
爲侯淚沾臆

舟抵困關

月曉烟如海溪枯雪滿沙東風白兩岸八十里梨花

近代詩鈔

周長庚

一



題天遊一覽亭

天遊出雲端看山俯我首孤亭跨虛空凌蹕騰萬有排闥招衆  
山窗陰百不受峰峰各自立相向不相偶石石勢趨下牽率盡  
東走楂枒森烟林歷亂伏低阜坤維紛凹凸巒影互踵肘造物  
控礮礫到此旋其紐厚地裂爲溪蜿蜒繞束帶綬灘湍流碎天天  
光低向右鴻濛費爬剔夸娥勞擊剖作此萬怪石鎖以一溪口  
回頭見幔亭倚檻與招手

水簾洞

一千尺檐瀑十二時雨聲洪荒直到我天地不曾晴暑氣銷雲  
窟寒光拂水晶仙家亦遺蛻誰此學長生



題天遊一覽亭

天遊出雲端看山俯我首孤亭跨虛空凌躡騰萬有排闥招衆  
山窗陰百不受峰峰各自立相向不相偶石石勢趨下奉奉盡  
東走極訝森迴林懸亂伏低阜坤維紛回凸樹影互輝射透嶺  
控嶺峰到此疑其紐厚地裂爲溪繞繞束帶經澗滿流碎天天  
光低向石鴻濛費爬剔奇城勞擊刮作此萬怪石嶺以一溪口  
回頭見樓亭倚檻與招手

水簾洞

一千尺瀉瀑十二時雨聲洪荒直到我天地不曾晴暑氣銷雲  
處寒光拂水晶仙家亦遺說誰此學長生



